

MESYUARAT KETIGA, PENGGAJ KETIGA  
PARLIMEN KEEMPAT BELAS  
2020

**HARI KHAMIS : 12 NOVEMBER 2020**

**JAWAPAN-JAWAPAN BAGI PERTANYAAN-PERTANYAAN JAWAB**

**LISAN YANG TIDAK DIJAWAB DI DALAM DEWAN**

**( SOALAN NO. 5, 10 HINGGA NO. 52 )**

**[SOALAN NO. 5 DIJAWAB BERSEKALI DENGAN SOALAN NO. 29]**

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE TIGA, PENGGAL KE TIGA,  
PARLIMEN KEEMPATBELAS**

---

**PERTANYAAN : JAWAB LISAN**

**DARIPADA : YB PUAN RUBIAH BT. WANG (KOTA  
SAMARAHAN)**

**TARIKH : 12 NOVEMBER 2020 (KHAMIS)**

**SOALAN**

**PUAN RUBIAH BINTI HAJI WANG [ KOTA SAMARAHAN ]** minta **MENTERI DALAM NEGERI** menyatakan trend kes-kes penipuan menerusi panggilan atau scammer serta usaha serta kejayaan Kerajaan membendung kegiatan ini.

**JAWAPAN**

**Tuan Yang Di Pertua,**

Izinkan saya menjawab soalan ini secara bersekali dengan 6 soalan lain yang turut membincangkan isu sama iaitu berkenaan dengan **Penipuan** atau **Telecommunication Fraud** oleh:-

1. YB Datuk Sri Dr. Wan Azizah [ Pandan ] bertarikh 12 November 2020;
2. YB Tuan Yamani Hafez bin Musa ( Sipitang ) bertarikh 9 Disember 2020;
3. YB Datuk Hj. Jalaluddin bin Hj. Alias ( Jelebu ) bertarikh 9 Disember 2020;
4. YB Prof Madya Dr. Rusnah bt Aluai ( Tangga Batu ) bertarikh 9 Disember 2020;
5. YB Puan Natrah bt Ismail ( Sekijang ) bertarikh 9 Disember 2020; dan
6. YB Tuan Mohd Nizar b. Hj. Zakaria ( Parit ) bertarikh 15 Disember 2020.

**Tuan Yang Di-pertua,**

Kementerian Dalam Negeri (KDN) memandang serius berhubung kes-kes yang melibatkan jenayah penipuan atas talian yang meliputi pelbagai kategori seperti penipuan melalui telefon & internet, *Love Scam*, pinjaman tidak wujud dan *Macau Scam*.

Kemajuan teknologi masa kini sedikit sebanyak membuka ruang kepada penipuan menerusi panggilan atau *scammer* ini. Namun, perlu diingat, *scammer* bukan sahaja melakukan penipuan secara panggilan, tetapi turut menggunakan kaedah lain menerusi kemudahan atas talian seperti menerusi e-mel palsu atau akaun media sosial. Namun begitu, ada juga penipuan yang menggunakan kedua-dua cara tersebut dimana lazimnya bermula melalui usaha memerangkap mangsa secara atas talian dan kemudiannya dihubungi melalui panggilan telefon. PDRM melalui Jabatan Siasatan Jenayah Komersil (JSJK), PDRM sentiasa memantau trend terkini penipuan menerusi panggilan atau atas talian.

Contoh modus operandi penipuan secara panggilan atau *telecommunication fraud* adalah seperti tawaran memenangi cabutan bertuah atau *spoofing*. *Spoofing* merupakan perbuatan menjadikan panggilan dari sumber yang tidak dikenali seolah-olah dibuat dari sumber yang dipercayai seperti anggota penguatkuasa, pegawai perundangan atau pegawai perbankan. Manakala, trend penipuan atas talian meliputi *phishing*, lottery scam, romance scam, penyamaran profil akaun media sosial, tawaran perniagaan atau barangan yang tidak wujud dan sebagainya.

**Tuan Yang Di Pertua,**

Selain daripada tindakan penguatkuasaan undang-undang, pihak PDRM mengambil inisiatif dengan memberikan pengetahuan dan kesedaran kepada masyarakat berkaitan penipuan jenayah atas talian melalui kempen-kempen kesedaran. PDRM juga sering menjalinkan kerjasama dengan lain-lain agensi dan NGO agar trend jenayah ini dapat dihebahkan dan masyarakat sentiasa dapat maklumat dan '*alert*' terhadap modus operandi penjenayah yang terkini.

## SOALAN NO : 5

PDRM juga telah membangunkan satu aplikasi dan portal laman web. Ia boleh dicapai di pautan <http://ccid.rmp.gov.my/semakmule>. Portal dan aplikasi ini memberikan kemudahan kepada orang awam membuat semakan ke atas akaun bank dan nombor telefon yang pernah terlibat dengan siasatan pihak polis. Mana-mana akaun bank yang digunakan sebagai akaun ketiga (*mule account*) yang digunakan oleh suspek bagi tujuan penipuan akan disekat penggunaannya oleh pihak bank.

PDRM sememangnya sentiasa bekerjasama dengan pelbagai pihak termasuklah Suruhanjaya Komunikasi dan Multimedia Malaysia (SKMM) untuk membanteras jenayah penipuan atas talian termasuklah Macau Scam. Selain SKMM, agensi lain yang turut memberikan kerjasama adalah pihak Bank Negara Malaysia, syarikat-syarikat telekomunikasi (telco) dan institusi bank-bank. Selain itu, pada Mac 2019 pula, sebuah Jawatankuasa Teknikal Jenayah Siber yang terdiri daripada PDRM dan Kementerian Komunikasi dan Multimedia Malaysia juga telah ditubuhkan bagi membanteras jenayah penipuan ini.

Tindakan di bawah Akta Pencegahan Pengubahan Wang Haram, Pencegahan Pembiayaan Keganasan dan Hasil Daripada Aktiviti Haram 2001 (AMLATFPUAA) bagi tujuan pembekuan dan pelucuthakan wang dari akaun keldai juga diambil oleh pihak PDRM. Bagi mana-mana suspek yang tidak cukup keterangan untuk di tuduh di mahkamah, mereka akan dikenakan tindakan di bawah undang-undang pencegahan seperti Akta Pencegahan Jenayah 1959 (POCA).

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN TEH KOK LIM [TAIPING]**

**TARIKH : 12 NOVEMBER 2020 (KHAMIS)**

**SOALAN**

**TUAN TEH KOK LIM [TAIPING]** minta **MENTERI KANAN PERDAGANGAN ANTARABANGSA DAN INDUSTRI** menyatakan pencapaian perdagangan untuk tahun terkini berbanding tahun-tahun yang lalu dan usaha-usaha yang telah diambil untuk memperbaiki kedudukan Malaysia di peringkat antarabangsa dan cabaran yang dihadapi.

**JAWAPAN**

Yang di-Pertua,

**Prestasi Perdagangan Januari-September 2020**

1. Jumlah perdagangan Malaysia bagi tempoh Januari hingga September 2020 mencatatkan pengurangan sebanyak 5.2 peratus kepada RM1.294 trilion berbanding tempoh yang sama tahun 2019. Eksport menyusut 3.7 peratus kepada RM709.56 bilion dan import berkurang 6.9 peratus kepada RM584.62 bilion. Lebihan dagangan pula mencatatkan RM124.94 bilion iaitu peningkatan sebanyak 14.8 peratus berbanding tempoh yang sama tahun 2019.

**Prestasi Perdagangan 2015-2019**

2. Dalam tempoh lima tahun terkini (2015-2019), jumlah perdagangan negara telah mencatatkan peningkatan purata tahunan secara keseluruhannya sebanyak 6 peratus, kepada RM1.844 trilion pada tahun 2019 berbanding RM1.463 trilion pada tahun 2015.

3. Jumlah eksport bagi tempoh yang sama mencatat pertumbuhan purata tahunan sebanyak 6.4 peratus kepada RM995.07 bilion pada tahun 2019 berbanding RM777.36 bilion pada tahun 2015. Antara sektor utama yang menyumbang kepada kenaikan eksport ini adalah barangan elektrik dan elektronik; kimia dan bahan kimia; keluaran petroleum; barangan optik dan saintifik; dan barangan besi dan keluli.

4. Dalam tempoh yang sama, jumlah import pula mencatatkan pertumbuhan purata tahunan sebanyak 5.5 peratus dengan nilai RM849.41 bilion pada tahun 2019 berbanding RM685.78 bilion pada tahun 2015. Import barangan pengantara (*intermediate goods*) merekodkan peningkatan tertinggi diikuti barangan penggunaan dan barangan modal.

5. Lebihan dagangan merekodkan peningkatan purata tahunan sebanyak 12.5 peratus di mana pada tahun 2019 lebihan dagangan mencatatkan nilai RM145.66 bilion berbanding pada tahun 2015 dengan nilai RM91.58 bilion.

**Sebab-sebab Penurunan Prestasi Perdagangan Januari-September 2020**

6. Penurunan eksport dan import ini adalah dijangka berikutan sekatan operasi yang dikenakan kepada kebanyakan sektor utama semasa tempoh Perintah Kawalan Pergerakan (PKP). Penyusutan juga berlaku di kebanyakan negara di seluruh dunia yang berada dalam keadaan sekatan pergerakan (*lockdown*) bagi membendung penularan pandemik COVID-19. Ini telah mengakibatkan gangguan serius terhadap aktiviti pembuatan serta rangkaian bekalan di peringkat global.
7. Penurunan eksport berlaku dalam hampir semua sektor utama khususnya gas asli cecair (LNG); kimia dan bahan kimia; barangan perkilangan logam; petroleum mentah; dan keluaran petroleum.
8. Walau bagaimanapun, terdapat peluang-peluang perniagaan bagi sektor-sektor tertentu, contohnya sektor keluaran getah. Eksport sarung tangan getah negara melonjak sebanyak 69.8 peratus bagi tempoh tersebut disokong oleh permintaan tinggi di pasaran global berikutan pandemik COVID-19. Selain itu, peningkatan eksport turut dilihat bagi produk peralatan perubatan seperti alat diagnostik elektro (*electro-diagnostic apparatus*), pembasmi kuman (*disinfectants*) dan pelitup muka pembedahan (*surgical mask*).

**Tuan Yang di-Pertua,**

**Langkah-Langkah Bagi Meningkatkan Eksport Malaysia**

9. Bagi memperkukuh dan meningkatkan jumlah eksport negara, MITI melalui MATRADE telah mengambil pelbagai langkah:

- i. **Yang pertamanya, membantu syarikat menjalankan promosi eksport dengan memperkukuhkan Geran Pembangunan Pasaran (*Market Development Grant - MDG*).**



- ii. Pelbagai risikan pasaran yang boleh diakses secara atas talian menerusi perkhidmatan MyExport disediakan untuk pengeksport.
- iii. MATRADE telah menyebarkan 2,514 *trade leads* iaitu pertanyaan perdagangan yang diterima daripada syarikat asing yang berminat untuk mendapatkan produk dan perkhidmatan dari Malaysia melalui perkhidmatan *MyExport*.
- iv. MATRADE turut melaksanakan padanan perniagaan antara pengimport luar negara dan pengeksport Malaysia melalui program eBizMatch yang dijalankan menerusi platform digital.
- v. Selaras dengan peningkatan aktiviti e-Dagang, MATRADE turut menggalakkan syarikat-syarikat tempatan menggunakan platform digital bagi tujuan eksport melalui program *eTRADE*.
- vi. Pemerkasaan pengeksport juga turut dipergiatkan menerusi aktiviti latihan pengeksport dengan menggunakan kaedah webinar di mana sebanyak 138 webinar telah dianjurkan dari 1 Januari sehingga 31 Oktober 2020.

10. MITI dan MATRADE akan terus berusaha untuk meningkatkan prestasi eksport negara bukan sahaja untuk memperbaiki kedudukan Malaysia di peringkat antarabangsa, tetapi yang lebih penting lagi bagi membantu negara untuk pulih daripada impak negatif wabak COVID-19 yang telah menjejaskan ekonomi negara.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN YUSUF BIN ABD. WAHAB  
[ TANJONG MANIS ]**

**TARIKH : 12 NOVEMBER 2020 (KHAMIS)**

**SOALAN**

Minta **MENTERI PERTANIAN DAN INDUSTRI MAKANAN** menyatakan bilakah kerja-kerja pembaikan struktur ban pertanian dan pintu air di kawasan Paloh Berangan dan Pulau Bruit akan dilaksanakan. Kerosakan ban dan pintu air ini telah menjejaskan hasil tanaman penduduk di kawasan-kawasan tersebut.

**JAWAPAN**

**Yang Di Pertua,**

Untuk makluman Yang Berhormat, Kementerian Pertanian dan Industri Makanan (MAFI) telah mengemukakan permohonan kepada EPU bagi tujuan perlaksanaan projek tersebut di dalam RMKe-12 dengan kos keseluruhan projek berjumlah RM15,000,000.00. Walau bagaimanapun, perlaksanaannya kelak adalah tertakluk kepada kelulusan permohonan tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN P. PRABAKARAN [ BATU ]**

**TARIKH : 12 NOVEMBER 2020 (KHAMIS)**

**SOALAN**

**TUAN P. PRABAKARAN [ BATU ]** minta **MENTERI WILAYAH PERSEKUTUAN** menyatakan apakah Kementerian akan menguatkuasakan lagi tindakan bagi sesuatu kawasan Pembangunan di mana rata-rata daripada mereka bekerja melebihi waktu yang dibenarkan.

**JAWAPAN**

**Tuan Yang Di Pertua,**

Untuk makluman Yang Berhormat Batu, Kerja Lebih Masa (KLM) dibahagikan kepada 2 jenis kebenaran iaitu:

**1) Kebenaran Kerja Lebih Masa (KLM)**

KLM ini adalah suatu kebenaran tambahan masa yang diberi secara terhad sebagai tambahan kepada waktu bekerja normal. (Waktu kerja normal adalah hari Isnin – Sabtu jam 7:00am – 7:00pm).

**2) Kebenaran Khas Kerja Lebih Masa (KKKLM)**

KKKLM ini diberikan berdasarkan kerja-kerja konkrit kritikal seperti “Transfer Floor”, Transfer slab” atau “Transfer beam” yang

mana penuangan konkrit yang berjumlah besar dan sekiranya kerja-kerja ini diberhentikan akan menyebabkan “cold joint” dan seterusnya menjejaskan kekuatan struktur sesuatu bangunan itu.

Asas KLM diberikan adalah berdasarkan:-

- 1) Pembangunan yang pesat dan permintaan yang tinggi terhadap industri hartanah menyebabkan pemaju dan kontraktor perlu melakukan kerja lebih masa di luar waktu normal;
- 2) Mengurangkan tempoh kesan kacauganggu pembinaan terhadap penduduk sekeliling;
- 3) Mempercepatkan tempoh penyiapan pembangunan berdasarkan perjanjian jual beli hartanah agar kelewatan penyerahan kunci kepada pihak pembeli dapat dikurangkan;
- 4) Tempoh pembinaan yang tidak mencukupi disebabkan isu kesesakan lalulintas, “*Road ban*” atau laluan terhad bagi kenderaan berat (7:00am – 9:00am dan 5:00pm – 7:00pm, tapak pembinaan yang berdekatan dengan kawasan sekolah/ rumah ibadat/ hospital yang mana kerja-kerja waktu normal adalah terhad; dan
- 5) Merancakkan ekonomi negara di mana sektor hartanah merupakan salah satu pemangkin kepada ekonomi yang memberi impak yang besar kepada negara khususnya Kuala Lumpur.

Namun begitu, sebelum sesuatu KLM atau KKKLM boleh diberi atau diluluskan, Dewan Bandaraya Kuala Lumpur (DBKL) telah menggariskan syarat-syarat yang perlu dipatuhi sepenuhnya oleh pihak kontraktor, pihak juruperunding serta pihak pemaju, iaitu:-

- 1) Perlu mengadakan sesi libat urus “*Public Engagement*” dengan pemegang taruh (stakeholders) merangkumi penduduk sekeliling, persatuan penduduk atau perbadanan pengurusan;

- 2) Mengemukakan laporan kaedah pengurangan/ pengawalan pencemaran bunyi bising yang disediakan oleh juruperunding bebas. Antara kaedah kawalan bunyi bising yang perlu dipatuhi adalah membina penghadang bunyi (*noise barrier*) atau penyerap bunyi (*noise chamber*) bagi pam konkrit di tapak bina dan kedudukan pam tersebut hendaklah jauh daripada kawasan yang bersempadanan dengan penduduk sekeliling;
- 3) Mengemukakan laporan kawalan habuk seperti penggunaan jaring keselamatan di sekeliling struktur bangunan yang sedang dalam pembinaan;
- 4) Mengemukakan laporan kawalan trafik keluar/ masuk tapak bina serta laluan lori-lori konkrit dan punca bekalan konkrit yang akan digunapakai bagi pembinaan tersebut; dan
- 5) Penggunaan lampu limbah dihadkan kepada kawasan yang dalam pembinaan sahaja dan difokuskan kepada ruang kerja yang aktif.

Seterusnya, sesuatu permohonan yang telah mematuhi syarat-syarat yang ditetapkan, suatu sesi taklimat perlu diberi kepada pihak DBKL bagi menilai dengan teliti sebelum dibawa ke mesyuarat Jawatankuasa Pusat Setempat (OSC) untuk pertimbangan. Sekiranya sesuatu permohonan tersebut dibenarkan, pihak DBKL akan memberi taklimat kepada pihak kontraktor, juruperunding dan pihak pemaju agar mematuhi syarat-syarat teknikal di dalam kebenaran KLM atau KKKLM.

Untuk makluman Ahli Yang Berhormat jua, sehingga 15 Oktober 2020 sebanyak 148 tapak bina yang telah diberi Kebenaran KLM di dalam Kuala Lumpur bagi tempoh 4 bulan.

Pecahan KLM yang dikeluarkan dari Januari hingga Oktober 2020 adalah seperti Jadual 1 di bawah:

<b>BIL.</b>	<b>KATEGORI KLM</b>	<b>BILANGAN TAPAK</b>
1.	KLM 7:00pm – 10:00pm	120
2.	KLM 7:00pm – 12:00pm	22
3.	KLM 7:00pm – 5:00am	6

Jadual 1: Bilangan KLM diberi kepada tapak bina di dalam Kuala Lumpur

Bagi tujuan pematuhan syarat-syarat KLM atau KKKLM yang diberi, pemantauan dan penguatkuasaan secara berterusan dilaksanakan oleh DBKL berdasarkan peruntukan perundangan di bawah Akta Jalan, Parit dan Bangunan 1974 (Akta 133).

Sekiranya berlaku pelanggaran ke atas waktu pembinaan di tapak-tapak pembinaan, tindakan penguatkuasaan seperti berikut akan diambil oleh DBKL, iaitu:-

- 1) Notis Kompaun di bawah subseksyen 70(13)(d), Akta 133 dikeluarkan kepada pihak kontraktor/juruperunding tapak bina tersebut;dan
- 2) Sekiranya 3 bilangan Notis Kompaun telah dikeluarkan kepada tapak bina tersebut, Notis Berhenti Kerja (*Stop Work Order*) akan dilaksanakan bagi suatu tempoh tidak kurang daripada 3 hari dan pada masa yang sama kebenaran KLM akan dibatalkan serta-merta.

Dimaklumkan dari tempoh Januari sehingga Oktober 2020 JPK telah mengeluarkan sebanyak 441 notis kompaun dan 23 notis berhenti kerja kepada beberapa tapak bina di dalam Kuala Lumpur.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN CHE ALIAS BIN HAMID [ KEMAMAN ]**

**TARIKH : 12 NOVEMBER 2020 (KHAMIS)**

**SOALAN**

Minta **MENTERI PENGANGKUTAN** menyatakan rancangan Kementerian bagi memastikan kebajikan puluhan ribu pekerja Malaysia Airlines Berhad terbela susulan rancangan penyusunan semula operasi kecemasan yang diumumkan baru-baru ini.

**JAWAPAN**

**Yang Dipertua,**

1. Di dalam Pembentangan Bajet 2021 baru-baru ini, Kementerian Kewangan telah menyatakan bahawa Kerajaan akan menyediakan program latihan dan penempatan semula bagi 8,000 kakitangan dari syarikat penerbangan di Malaysia dengan peruntukan sebanyak RM50 juta ringgit.

2. Sehubungan itu, Kementerian Pengangkutan akan bekerjasama dengan Kementerian Sumber Manusia bagi merancang program latihan dan penempatan semula kakitangan dari syarikat penerbangan yang terkesan akibat pandemik COVID-19 di Malaysia. Dalam hubungan ini, program peningkatan kemahiran dan latihan semula atau *reskilling and upskilling* akan dirancang untuk dilaksanakan dengan tumpuan kepada kebolehpasaran pekerja dan padanan pekerjaan. Program ini akan membantu meningkatkan peluang pekerjaan bagi kakitangan syarikat penerbangan yang terjejas akibat rancangan penyusunan semula operasi kecemasan yang diumumkan MAB baru-baru ini.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN SYED SADDIQ BIN SYED ABDUL  
RAHMAN [ MUAR ]**

**TARIKH : 12 NOVEMBER 2020 (KHAMIS)**

**SOALAN**

**TUAN SYED SADDIQ BIN SYED ABDUL RAHMAN [ MUAR ]** minta **MENTERI KESIHATAN** menyatakan apakah perkembangan Kertas Cadangan Penyelarasan Gaji Pegawai Perubatan Kontrak memandangkan prinsip Upah Mengikut Kerja tidak dilaksanakan dengan baik kepada semua pegawai perubatan. Adakah Kementerian Kesihatan akan mengiktiraf bahawa tugas dan tanggungjawab Pegawai Perubatan Kontrak adalah setara dengan Pegawai Perubatan Lantikan Tetap.

**JAWAPAN**

**Tuan Yang di-Pertua,**

1. Kementerian Kesihatan menghargai setiap pegawai yang berkhidmat sama ada secara tetap, mahupun kontrak. Namun begitu, perlu difahami bahawa lantikan kontrak ini merupakan satu penyelesaian kepada masalah perjawatan tetap yang terhad berbanding dengan keluaran graduan.
2. Kementerian Kesihatan sentiasa berusaha untuk melakukan penambahbaikan terhadap laluan kerjaya semua skim perkhidmatan yang terlibat, terutama bagi Pegawai Perubatan.
3. **Kertas cadangan pelaksanaan pelantikan secara kontrak Pegawai Perubatan yang menjalani khidmat wajib atas Gred UD43 telah dibentangkan sebelum ini, namun Kementerian Kesihatan**



**diminta untuk meneliti semula dengan melaksanakan beberapa elemen penjimatan.** Kertas tersebut telah siap dikemaskini serta telah mendapat ulasan daripada Kementerian Kewangan (MOF), Suruhanjaya Perkhidmatan Awam (SPA) dan Jabatan Perkhidmatan Awam (JPA). **Kertas ini akan dibentangkan semula untuk kelulusan Kerajaan dalam masa terdekat.**

4. **Pelarasan gred ini dilaksanakan berdasarkan prinsip *rate for the job* (dengan izin) dan selaras dengan laluan kerjaya Pegawai Perubatan lantikan tetap.** Namun, bagi memastikan tempoh khidmat wajib berjalan lancar, pada masa ini Kerajaan masih menawarkan kontrak untuk melengkapkan khidmat wajib pada Gred UD41. **Perubahan gred pegawai akan diselaraskan semula kepada Gred UD43 setelah pelaksanaannya diluluskan oleh Kerajaan.**

5. KKM sentiasa berusaha untuk meningkatkan bilangan Pegawai Perubatan bagi memenuhi keperluan perkhidmatan kesihatan semasa dan akan datang. Walau bagaimanapun, perlu difahami bahawa pertambahan jawatan Pegawai Perubatan adalah bergantung kepada keperluan perkhidmatan terutama di fasiliti baharu dan yang dinaik taraf serta keupayaan kewangan Kerajaan, dan bukannya bergantung kepada faktor jumlah keluaran graduan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' SRI HAJAH ROHANI BINTI HAJI  
ABDUL KARIM [BATANG LUPAR]**

**TARIKH : 12 NOVEMBER 2020 (KHAMIS)**

**SOALAN**

**DATO' SRI HAJAH ROHANI BINTI HAJI ABDUL KARIM [BATANG LUPAR]** minta **MENTERI SUMBER MANUSIA** menyatakan adakah terdapat kajian khusus keberkesanan dan impak mengenai amalan norma baharu seperti bekerja dari rumah, yang dijalankan sepanjang tempoh PKP yang lalu dan juga masa akan datang agar produktiviti pekerja sentiasa ditahap yang memuaskan.

**JAWAPAN**

**Tuan Yang di-Pertua,**

1. Untuk makluman Ahli-Ahli Dewan Yang Mulia ini, setakat ini masih belum ada sebarang kajian khusus yang dilaksanakan oleh Kerajaan berkaitan keberkesanan dan impak mengenai amalan norma baharu. Salah satu daripada amalan norma baharu yang selalu dipraktikkan adalah bekerja dari rumah. Sekiranya kajian berhubung terma 'bekerja dari rumah' dilaksanakan, aspek-aspek seperti kesediaan teknologi, ketiadaan ruang kerja yang khusus, kekurangan sumber inspirasi dan ketiadaan sokongan rakan sekerja akan dikaji memandangkan keadaan persekitaran rumah amat berbeza berbanding dengan suasana di tempat kerja. Bekerja dari rumah juga memerlukan aspek disiplin kerja dan penjadualan yang sistematik untuk mencapai tahap produktiviti yang terbaik.

2. Walau bagaimanapun, pekerja wajib melaksanakan tugasnya sekiranya diarahkan bekerja dari rumah semasa Perintah Kawalan Pergerakan (PKP) dan gaji mereka hendaklah dibayar seperti biasa. Keadaan ini adalah merujuk kepada peruntukan di bawah Akta Kerja 1955 mengenai kewajipan membayar upah dan berkaitan dengan kaedah *work done*.

3. Kementerian Sumber Manusia bercadang untuk memasukkan peruntukan baharu dalam pindaan Akta Kerja 1955 yang akan datang berhubung waktu kerja fleksibel yang memberi fleksibiliti kepada pekerja dan majikan dalam menentukan waktu kerja tertakluk kepada syarat-syarat tertentu.

4. Hubungan pekerjaan menjadi suatu keperluan untuk memastikan majikan mahupun pekerja dapat berkomunikasi dengan baik dan berkesan.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN WONG LING BIU [ SARIKEI ]**

**TARIKH : 12 NOVEMBER 2020 (KHAMIS)**

**SOALAN**

**TUAN WONG LING BIU [ SARIKEI ]** minta **MENTERI KESIHATAN** menyatakan apakah punca utama kematian pesakit COVID-19 di negara kita.

**JAWAPAN**

**Tuan Yang di-Pertua,**

1. **Kes kematian COVID-19 yang pertama di Malaysia adalah pada 17 Mac 2020.** Sehingga 10 November 2020, **bilangan kematian COVID-19 di Malaysia adalah sebanyak 300 kematian iaitu bersamaan dengan 0.71%.** Jika dibuat perbandingan dengan negara-negara jiran di Asia Tenggara, kadar kematian ini adalah agak rendah di mana Indonesia (3.33%), Vietnam (2.88%), Thailand (1.56%), Brunei (2.02%) dan Singapura (0.05%).
2. Merujuk kepada data kematian COVID-19, **daripada 300 kematian ini, 67.33% adalah terdiri daripada pesakit lelaki dan 86% adalah merupakan warganegara Malaysia.** 85.33% (iaitu bersamaan 256 kes) daripada jumlah kematian ini adalah terdiri daripada pesakit yang berumur 50 tahun dan ke atas yang mana majoritinya adalah terdiri daripada pesakit yang berumur di antara 60 hingga 69 tahun iaitu sebanyak 90 kes (bersamaan 30%) daripada jumlah keseluruhan kematian.
3. **Sejumlah 216 kes kematian (iaitu bersamaan 72%) adalah merupakan kes kematian yang telah menerima rawatan di fasiliti**

**kesihatan Kementerian Kesihatan Malaysia, manakala selebihnya iaitu 84 kes kematian (bersamaan 28%) adalah kematian yang berlaku sebelum tiba mendapatkan rawatan fasiliti kesihatan.**

Terdapat sebanyak 162 kes kematian di Sabah, 29 di Wilayah Persekutuan Kuala Lumpur, 22 di Johor, 19 di Sarawak, 18 di Selangor dan selebihnya di lain-lain negeri.

4. Jika dilihat pada faktor risiko komorbiditi, 86.57% (iaitu 232 kes) mempunyai sekurang-kurangnya satu (1) jenis penyakit lain seperti darah tinggi, kencing manis, sakit jantung dan sakit buah pinggang. Daripada jumlah ini, 59.70% (iaitu 160 kes) mempunyai sekurang-kurangnya dua (2) jenis penyakit atau lebih.

5. Pesakit COVID-19 dikategorikan berdasarkan 5 tahap klinikal iaitu Tahap 1 yang tidak bergejala manakala Tahap 5 adalah bagi kes kritikal yang melibatkan pelbagai organ. **Didapati majoriti kes kematian yang mendapatkan rawatan tiba di hospital pada tahap yang tenat iaitu pada Tahap 4 sebanyak 54.63% dan kritikal iaitu pada Tahap 5 sebanyak 26.85%.**

6. **Punca kematian pula adalah severe pneumonia, iaitu jangkitan paru-paru yang teruk serta melibatkan kegagalan fungsi organ-organ lain, di mana ianya merangkumi sebanyak 260 kes (iaitu 89.66%) daripada jumlah keseluruhan kematian,** diikuti oleh sakit jantung akut sebanyak 19 kes (iaitu 6.55%) dan selebihnya adalah melibatkan lain-lain punca seperti kanser.

7. Kesimpulannya, berdasarkan statistik yang telah dibentangkan, dapatlah dirumuskan bahawa faktor-faktor risiko yang boleh menyumbang kepada kematian kes COVID-19 adalah faktor umur, pesakit yang berusia 50 tahun keatas; pesakit yang mempunyai komorbiditi, terutamanya darah tinggi, kencing manis dan lain-lain penyakit kronik; serta tahap klinikal pesakit adalah dalam tahap yang tenat dan kritikal ketika mendapatkan rawatan di fasiliti kesihatan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KE EMPAT BELAS**

---

**PERTANYAAN : LISAN**

**DARIPADA : DATO' SERI HAJI IDRIS BIN JUSOH [ BESUT ]**

**TARIKH : 12 NOVEMBER 2020 (KHAMIS)**

**SOALAN**

Minta **MENTERI PERTANIAN DAN INDUSTRI MAKANAN** menyatakan apakah strategi Kementerian dalam aspek penggunaan mekanisasi dalam mengubah lanskap sektor agro makanan negara pada masa akan datang.

**JAWAPAN**

**Yang di-Pertua,**

1. Untuk makluman Yang Berhormat, selaras dengan perkembangan teknologi moden dan perkembangan Revolusi Industri 4.0, penggunaan teknologi dalam pertanian dapat mempercepatkan dan meningkatkan pengeluaran hasil pertanian. Penggunaan teknologi pertanian (mekanisasi dan automasi), dron dan aplikasi mudah alih akan membantu petani dalam semua proses bermula dari penanaman hingga kepada pemasaran dan mengurangkan penggunaan tenaga buruh.

2. Pada masa kini, Kementerian sedang melaksanakan Program Mekanisasi dan Automasi Agromakanan dan sebanyak RM76.12 juta telah diagihkan kepada Jabatan/Agensi bagi tujuan:

- i. Perolehan peralatan mekanisasi terutamanya jentuai, traktor, jentanam (*transplanter*), implemen dan lain-lain;
- ii. Kajian penyelidikan; dan
- iii. Latihan.

3. Kementerian melalui MARDI juga telah menjalankan pelbagai penyelidikan bagi meningkatkan daya saing dan nilai tambah dalam industri pengeluaran pertanian negara. Senarai aktiviti-aktiviti R&D berkaitan teknologi mekanisasi utama MARDI adalah seperti:

- i. Projek Rintis Kilang Tanaman;
- ii. Pertanian Tepat Padi ( *Early Warning System* (EWS), Pemetaan, Model Pembajaan *Variable-rate Technology* (VRT));
- iii. Mekanisasi lepas tuai bagi pengurangan kehilangan lepas tuai padi serta pengeringan, pemprosesan dan pengendalian lepas tuai bijian, padi dan nangka; dan
- iv. Mekanisasi ladang (Pusat Pengujian Jentera, Integrasi Jentera untuk tanah bermasalah).

4. Antara strategi Kementerian dalam aspek penggunaan teknologi adalah termasuk:

- i. Meningkatkan pemilikan dan penggunaan teknologi pertanian seperti traktor dan jentera dikalangan golongan sasaran di bawah Kementerian;
- ii. Memperkukuh program penyelidikan dan pembangunan dalam bidang mekanisasi dan automasi bagi meningkatkan kapasiti penggunaan; dan
- iii. Meningkatkan kemahiran dan sokongan teknikal kepada pegawai pengembangan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE TIGA, PENGGAL KE TIGA,  
PARLIMEN KEEMPATBELAS**

---

**PERTANYAAN : JAWAB LISAN**

**DARIPADA : YB TUAN KARUPAIYA A/LMUTUSAMI (PADANG  
SERAI)**

**TARIKH : 12 NOVEMBER 2020 (KHAMIS)**

**SOALAN**

**TUAN KARUPAIYA A/L MUTUSAMI [ PADANG SERAI ]** minta **MENTERI  
DALAM NEGERI** menyatakan perhatian yang serius akan undang-undang  
yang sedia ada berkaitan minuman keras di tempat awam. Sejauh manakah  
undang-undang itu dikuatkuasakan terhadap gejala yang tidak sihat.



**JAWAPAN**

**Tuan Yang Di Pertua,**

Penjualan arak di Malaysia dikawal oleh beberapa peruntukan undang-undang sedia ada dan penguatkuasaannya dilaksanakan oleh beberapa agensi Kerajaan di peringkat persekutuan, negeri dan Pihak Berkuasa Tempatan (PBT). Di peringkat persekutuan, penjualan arak dikawal oleh Jabatan Kastam Diraja Malaysia (JKDM) di bawah Kementerian Kewangan manakala undang-undang yang berkaitan dengan pelesenan jualan arak oleh JKDM adalah Akta Kastam 1967 (Akta 235) dan Akta Eksais 1976 (Akta 176).

Penguatkuasaan di bawah bidang kuasa Polis Diraja Malaysia (PDRM) adalah tertumpu kepada kesalahan-kesalahan yang dilakukan oleh mereka yang dipengaruhi oleh minuman yang memabukkan. Antaranya ialah memandu dalam keadaan mabuk, melakukan jenayah dan berkelakuan tidak senonoh di tempat awam dalam keadaan mabuk. Antara undang-undang yang digunapakai ialah Akta Kesalahan-Kesalahan Kecil 1955 (Akta 336), Kanun Keseksaan dan lain-lain undang-undang yang sedia ada.

PDRM sentiasa melakukan rondaan dan pemeriksaan di kawasan premis-premis pusat hiburan yang menjual minuman keras untuk memastikan keadaan sentiasa terkawal dan pengusaha pusat-pusat hiburan mematuhi syarat yang telah ditetapkan oleh pihak berkuasa. Pengusaha premis pusat hiburan berlesen juga diminta untuk mengawal keadaan dan sikap pengunjung yang berkunjung ke premis supaya tidak keterlaluan bagi memastikan tiada perkara yang tidak diingini berlaku.

Untuk makluman, sepanjang tempoh Januari 2020 sehingga September 2020 sebanyak 40 kertas siasatan telah dibuka di bawah pelbagai seksyen kesalahan berkaitan minuman keras. Daripada jumlah tersebut, 37 kertas siasatan telah berjaya dituduh manakala hanya tiga (3) kertas siasatan telah di NFA. Ini menggambarkan bahawa peruntukan daripada undang-undang sedia ada telah diguna pakai dengan sebaiknya oleh pihak berkuasa bagi membanteras gejala tidak sihat yang berkaitan minuman keras.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN KHALID BIN ABD SAMAD  
[ SHAH ALAM ]**

**TARIKH : 12 NOVEMBER 2020 (KHAMIS)**

**SOALAN**

**TUAN KHALID BIN ABD SAMAD [ SHAH ALAM ]** minta **MENTERI ALAM SEKITAR** menyatakan secara terperinci sebab-sebab berlakunya banjir kilat di kawasan Masjid Jamek pada 10 September 2020. Apakah usaha-usaha yang telah dirancang oleh pihak Kementerian untuk mengelakkan kejadian yang sama berlaku semula.

**JAWAPAN**

**Tuan Yang Di-Pertua,**

1. Kejadian banjir kilat yang berlaku di kawasan Masjid Jamek pada 10 September 2020 adalah disebabkan hujan lebat berpanjangan dengan bacaan maksimum sehingga 197mm (stesen Gombak Simpang 3) bagi tempoh 5 jam menyebabkan sistem saliran sedia ada tidak dapat menampung air larian permukaan yang banyak. Kebanyakan kawasan-kawasan yang dilanda banjir adalah di kedudukan yang rendah berbanding kawasan sekitar.

2. Pada ketika itu juga, Terowong SMART telah beroperasi pada Mod 4 (melibatkan penutupan penuh terowong SMART) untuk melencongkan air Sg Klang dan ini telah membantu mengelakkan kejadian banjir yang lebih teruk berlaku di pusat bandar Kuala Lumpur. Berdasarkan anggaran kasar, operasi Mod 4 dijangka akan dapat menyelamatkan potensi nilai

## NO. SOALAN : 19

kerosakan akibat banjir sebanyak RM15.6 juta setiap kali operasi Mod 4 diaktifkan. Operasi melencongkan air melalui terowong SMART telah dijalankan mengikut SOP yang telah ditetapkan pada tarikh 10 September 2020. Sebanyak 3.4 juta meterpadu air telah dilencongkan pada hari tersebut.

3. Kementerian melalui JPS telah mengambil beberapa pendekatan melalui pelaksanaan kaedah struktur dalam usaha untuk mengurangkan impak akibat banjir seperti pelaksanaan projek Rancangan Tebatan Banjir (RTB), kerja lencongan air sungai serta kerja membina dan menaiktaraf kolam takungan banjir.

4. Dalam RMKe-11, Kementerian telah meluluskan peruntukan sebanyak RM662.9 juta kepada JPS bagi melaksanakan projek-projek pembangunan khususnya di Wilayah Persekutuan Kuala Lumpur. Daripada jumlah itu, bagi tujuan pelaksanaan tebatan banjir, sebanyak RM140.6 juta telah diluluskan. Selain projek-projek bersaiz tender, peruntukan bagi projek-projek kecil juga telah diluluskan bagi program pemuliharaan sungai untuk mengurangkan risiko banjir dengan peruntukan sebanyak RM53.6 juta dan projek-projek kecil dalam Pakej Rangsangan Ekonomi (PRE) 2020 sebanyak RM1.1 juta.

5. Dalam RMKe-12 pula, projek-projek Rancangan Tebatan Banjir (RTB) Upper Sg. Klang dan Rancangan Tebatan Banjir (RTB) Sungai Bunus telah dimohon. Program Penyediaan Pelan Induk dan Peta Hazard Banjir bagi Lembangan Sungai Pelbagai Negeri yang merangkumi skop Kajian Peta Hazard Lembangan Sg. Klang juga telah dimohon dalam RMKe-12 untuk mengkaji semula senario banjir seiring dengan keadaan semasa dan masa hadapan berdasarkan pelan struktur perancangan terkini dan kesan daripada faktor perubahan iklim.

6. Kementerian juga berpandangan selain daripada usaha-usaha yang dirancang dan telah dijalankan oleh Kementerian, peranan pihak PBT juga adalah penting. Pihak PBT disarankan agar merujuk Pelan Pengurusan Lembangan Sungai Bersepadu (IRBM) Sg. Klang yang telah dihasilkan oleh Lembaga Urus Air Selangor (LUAS) sejak tahun 2016 dan disarankan untuk mempertingkatkan pemakaian dan tahap

## NO. SOALAN : 19

penguatkuasaan bagi Pelan Kawalan Hakisan dan Kelodak (ESCP) seperti yang terkandung dalam Manual Saliran Mesra Alam (MSMA) yang dikeluarkan oleh JPS, untuk memastikan pembangunan guna tanah dilaksanakan secara lestari dan meminimalkan kemungkinan menyebabkan banjir kilat.

7. PBT juga disarankan untuk mempertingkatkan tahap pemakaian MSMA dalam meluluskan permohonan pelan saliran sesuatu projek pembangunan oleh pemaju. MSMA sememangnya menggunakan pendekatan kawalan di punca (*control at source*) bagi menguruskan air saliran dengan menggalakkan infrastruktur storan untuk menahan air larian daripada projek pembangunan itu daripada terus mengalir ke sungai terlalu cepat semasa hujan lebat. Pendekatan begini boleh mengurangkan kejadian banjir kilat dalam jangka masa panjang.

8. Daripada semakan JPS, suatu Pelan Induk Sistem Saliran dan Pengurusan Air Hujan bagi Bandaraya Kuala Lumpur telah dihasilkan oleh PBT sejak Mei 2017, namun ianya masih menggunakan pendekatan terdahulu iaitu konsep pembuangan cepat (*rapid disposal*) yang akan hanya mengalihkan masalah banjir ke kawasan hilir. Oleh itu, kajian semula pelan induk tersebut disarankan dibuat dengan penggunaan MSMA sebagai asas rujukan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : YB TUAN AKMAL NASRULLAH  
BIN MOHD NASIR [ JOHOR BAHARU ]**

**TARIKH : 12 NOVEMBER 2020 (KHAMIS)**

**SOALAN**

**TUAN AKMAL NASRULLAH BIN MOHD NASIR [JOHOR BHARU]** minta **MENTERI SUMBER MANUSIA** menyatakan tindakan Kerajaan bagi membantu rakyat Malaysia yang bekerja di Singapura yang telah terputus pendapatan atau yang bakal hilang pekerjaan.

**JAWAPAN**

**Tuan Yang di-Pertua,**

1. Untuk makluman Ahli-Ahli Dewan Yang Mulia ini, pandemik COVID-19 yang melanda rantau ini telah memberi kesan kepada pekerja di seluruh dunia termasuk pekerja Malaysia di Singapura. Penamatan pekerja Malaysia di Singapura mula ketara pada suku ke-3 tahun 2020 apabila masalah ekonomi kian meruncing dan pihak majikan terpaksa mengurangkan kos operasi melalui pengurangan tenaga kerja.

2. Kesan yang ketara adalah kehilangan pendapatan akibat daripada tindakan pengurangan kos operasi oleh syarikat. Kehilangan pendapatan ini merangkumi pengurangan gaji secara sementara atas tindakan pengurangan hari atau waktu bekerja demi memastikan pekerjaan pekerja dapat dikekalkan. Kehilangan pendapatan ini juga mendorong kepada kehilangan pekerjaan secara tetap apabila tindakan penamatan perkhidmatan pekerja terpaksa dilakukan oleh majikan. Terdapat juga penamatan yang berlaku akibat daripada penutupan syarikat majikan secara tetap.

3. Secara umumnya, pekerja akan dilindungi oleh undang-undang pekerjaan di mana seseorang itu bekerja. Dalam konteks ini, pekerja Malaysia di Singapura, adalah turut tertakluk di bawah undang-undang pekerjaan dan polisi penggajian pekerja asing Kerajaan Singapura. Sehubungan dengan itu, Pihak Atase Buruh Malaysia di Singapura sentiasa bekerjasama dengan pihak *Ministry of Manpower Singapore* (MOM) bagi memastikan hak dan kebajikan pekerja Malaysia sentiasa dipelihara.

**Tuan Yang di-Pertua,**

4. Bagi memastikan hak dan kebajikan pekerja Malaysia sentiasa terpelihara, pihak Pejabat Atase Buruh telah mengambil beberapa inisiatif

untuk membantu pekerja-pekerja yang terkesan ini. Antara inisiatif tersebut adalah merangkumi perkara-perkara berikut:

- (i) **Khidmat nasihat perburuhan kepada pekerja Malaysia yang terlibat dengan penamatan pekerjaan**
  - a. Para pekerja yang melaporkan penamatan akan diberi khidmat nasihat mengenai hak mereka di bawah undang-undang dan polisi perburuhan Kerajaan Singapura. Setakat ini, terdapat **348 orang pekerja Malaysia** yang melaporkan penamatan kerja mereka kepada Pejabat Atase Buruh Malaysia di Singapura dari **16 Jun hingga 21 Oktober 2020**. Daripada jumlah ini, sebanyak **33% menyatakan mereka telah dibayar faedah penamatan**, manakala selebihnya tidak dibayar faedah penamatan kerana tidak memenuhi syarat-syarat yang ditetapkan.
  - b. Di samping itu, pihak Pejabat Atase Buruh turut memberikan khidmat nasihat perburuhan kepada rakyat Malaysia yang telah diberhentikan dan juga yang telah pulang ke Malaysia supaya mereka mendaftarkan diri di **MYFuturejobs** di bawah seliaan Kementerian Sumber Manusia untuk mendapatkan peluang pekerjaan baharu di Malaysia.
- (ii) Menjalinkan kerjasama dengan pihak *Ministry of Manpower Singapore* (MOM) berhubung aduan pekerja Malaysia
  - a. Sekiranya pekerja Malaysia merasakan keputusan majikan atau perundangan sedia ada tidak memberikan keadilan sewajarnya, mereka boleh memfailkan kes aduan kepada pihak *Ministry of Manpower Singapore* (MOM). Pejabat Atase Buruh akan membantu dengan memantau kes aduan tersebut dan melaksanakan tindakan '*follow up*' dengan pihak *Ministry of Manpower Singapore* (MOM).

- (iii) Menjalinkan kerjasama bersama pertubuhan bukan kerajaan (NGO)
- a. Jalinan kerjasama yang diusahakan termasuklah mencari dan menyenaraikan tempat tinggal yang bersesuaian dan harga berpatutan bagi pekerja yang terpaksa tinggal di Singapura disebabkan kesukaran untuk berulang alik dari Malaysia ke Singapura. Di samping itu, usaha juga dibuat untuk membantu menyediakan tempat tinggal sementara untuk pekerja yang terkandas sebelum pulang ke tanah air.
  - b. Selain itu, pihak Pejabat Atase Buruh turut menghubungi para pekerja yang terkandas supaya bantuan sewajarnya dapat diberikan dengan kadar segera seperti memudahkan dan melancarkan proses kepulangan mereka ke Malaysia.
- (iv) Membantu menguruskan penghantaran pulang pekerja kumpulan rentan (*vulnerable group*)
- a. Pihak Pejabat Atase Buruh turut membantu menguruskan pengangkutan pulang ke Malaysia kepada pekerja kumpulan rentan (*vulnerable group*) seperti orang kurang upaya (OKU), wanita mengandung dan orang tua yang terkandas di Singapura.

**Tuan Yang di-Pertua,**

5. Bagi mereka yang pulang mencari kerja di Malaysia, Kerajaan memperkenalkan beberapa inisiatif bagi mereka yang kehilangan pekerjaan. Antara **inisiatif PENJANA berkaitan sumber manusia**, iaitu :

- i) **Program Subsidi Upah** merupakan bantuan kewangan yang dibayar kepada majikan setiap perusahaan bagi setiap pekerja tempatan yang bergaji RM4,000 ke bawah.



- ii) **Menaik taraf Portal Perkhidmatan Pekerjaan Negara** bertujuan untuk memperkukuh portal pekerjaan dan padanan kerja serta bekerjasama dengan portal pekerjaan swasta untuk padanan kerja.
- iii) **Program Insentif Pengambilan Pekerja dan Bantuan Latihan** bagi menggalakkan pengambilan pekerja dengan menyediakan insentif kewangan kepada majikan.
- iv) **Program Kemahiran dan Peningkatan Kemahiran** bagi meningkatkan kebolehpasaran golongan penganggur melalui program latihan untuk mendapat kemahiran dan meningkatkan kemahiran.
- v) **Perlindungan Sosial dan Latihan bagi Pekerja Ekonomi Gig** untuk menjamin keselamatan sosial dan kebajikan golongan pekerja ekonomi gig.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN CHOW KON YEOW [ TANJONG ]**

**TARIKH : 12 NOVEMBER 2020 (KHAMIS)**

**SOALAN**

Minta **MENTERI PENGANGKUTAN** menyatakan status projek naik taraf Lapangan Terbang Antarabangsa Pulau Pinang (PIA) ekoran permohonan Kerajaan Negeri Pulau Pinang pada mesyuarat Majlis Perancang Fizikal Negara (MPFN) Ogos 2020 supaya tidak menangguhkannya berasaskan pelaksanaan kajian National Airport Strategic Plan (NASP).

**JAWAPAN**

**Yang Dipertua,**

1. Untuk makluman Yang Berhormat, mesyuarat Majlis Perancangan Fizikal Negara (MPFN) Ke-35 (Bil.2/2020) yang telah bersidang pada 13 Ogos 2020 antara lainya telah memutuskan supaya mana-mana Kerajaan Negeri yang mempunyai sebarang cadangan untuk menaiktaraf lapangan terbang sedia ada di negeri masing-masing hendaklah mengadakan rundingan bersama Kementerian Pengangkutan.

2. Dalam hubungan ini, seperti mana Yang Berhormat sedia maklum, YB Menteri Pengangkutan telah mengadakan perbincangan dengan Yang Berhormat pada 27 Ogos 2020 bagi cadangan pelaksanaan projek naik taraf Lapangan Terbang Antarabangsa Pulau Pinang (PIA). Semasa pertemuan tersebut, pihak Kementerian telah memaklumkan bahawa

bahawa disebabkan penularan wabak disebabkan penularan wabak COVID-19 yang telah memberi kesan negatif terhadap industri penerbangan negara terutama kemampuan MAHB untuk membiayai projek tersebut. Dalam hubungan ini, syarikat penerbangan dijangka memerlukan tempoh masa 3 tahun untuk pulih sepenuhnya dari impak wabak COVID-19, tertakluk kepada situasi semasa penularan wabak tersebut di dalam dan luar negara.

3. Berdasarkan perkembangan terkini dan kekurangan permintaan dalam industri penerbangan negara, projek ini akan ditangguhkan sehinggalah industri penerbangan dipulihkan. Untuk tempoh ini, Kerajaan Negeri Pulau Pinang disaran untuk segera menyelesaikan beberapa isu termasuk pengambilan tanah bagi membolehkan projek naiktaraf LTAPP dilaksanakan setelah industri penerbangan pulih.

4. Pada masa yang sama, bagi memastikan keperluan pembangunan jangka panjang lapangan terbang/padang terbang di Malaysia berdasarkan keperluan industri semasa mengambil kira impak COVID-19 dan keperluan sistem jaringan kesalinghubungan pengangkutan negara, Kementerian Pengangkutan akan melaksanakan kajian *National Airports Strategic Plan* (NASP) yang akan bermula pada tahun 2021 dan dijangka akan dimuktamadkan pada tahun 2023.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL PERTAMA,  
PARLIMEN KEEMPATBELAS**

---

**PERTANYAAN : JAWAB LISAN**

**DARIPADA : YB TUAN SIVARASA A/L K.RASIAH (SUNGAI  
BULOH)**

**TARIKH : 12 NOVEMBER 2020 (KHAMIS)**

**SOALAN**

**TUAN R. SIVARASA [ SUNGAI BULOH ]** minta **MENTERI DALAM NEGERI** menyatakan apakah tindakan yang telah diambil, sedang dan akan diambil oleh PDRM untuk menahan En Muhamad Riduan (dulu K Padmanathan) suami kepada Puan Indira Gandhi supaya anak perempuan mereka Prasana Diksa akan dikembalikan kepada ibunya selaras dengan perintah Mahkamah.

**JAWAPAN**

**Tuan Yang Di Pertua,**

Sebaik sahaja Mahkamah Tinggi, Ipoh, Perak memberikan hak penjagaan ketiga-tiga anak kepada Puan Indira Gandhi pada 11 Mac 2010, pihak PDRM telah memulakan usaha mencari bekas suami Puan Indira iaitu Encik Patmanathan A/L Krishnan atau Muhammad Ridzuan bin Abdullah dan anak perempuan mereka yang dipercayai berada dalam jagaan Encik Muhammad Ridzuan pada ketika itu.

PDRM juga telah membuat semakan dengan rekod di Jabatan Pendaftaran Negara (JPN) dan telah membuat pemeriksaan di semua alamat yang pernah didiami oleh Encik Muhammad Ridzuan, namun didapati individu tersebut tidak lagi menetap di alamat-alamat tersebut.

**Tuan Yang Di Pertua,**

Encik Muhammad Ridzuan telah disenaraikan oleh pihak PDRM sebagai orang yang dikehendaki. Selain itu, permohonan Senarai Pekeliling Khas (SPK A) telah dibuat bagi memantau pergerakan keluar masuk keluar negara. Nama subjek juga telah disenaraihitamkan dalam rekod Jabatan Imigresen untuk mengesan serta menangkapnya jika dia cuba melarikan diri keluar negara menggunakan pintu masuk dan keluar negara yang diwartakan di bawah Akta Imigresen 1959/63.

Walau bagaimanapun, berdasarkan siasatan pihak PDRM, dipercayai Encik Muhammad Ridzuan tidak berada di Malaysia dan menggunakan laluan yang tidak diwartakan, serta tidak berada tetap di satu-satu tempat di luar negara tetapi bergerak dari satu tempat ke satu tempat yang lain dalam usaha menghalang daripada dikesan serta menyukarkan pihak berkuasa menjalankan siasatan. Pihak PDRM juga menjalin kerjasama dengan pihak berkuasa negara jiran bagi mengenalpasti lokasi subjek. Pihak PDRM akan mengambil tindakan undang-undang berdasarkan peruntukan sedia ada sekiranya subjek pulang ke negara ini.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : YB TUAN KESAVAN A/L SUBRAMANIAM  
[SUNGAI SIPUT]**

**TARIKH : 12 NOVEMBER 2020 (KHAMIS)**

**SOALAN**

**TUAN KESAVAN A/L SUBRAMANIAM [SUNGAI SIPUT]** minta **MENTERI SUMBER MANUSIA** menyatakan sejauh manakah Program Karnival Penjanaan Kerjaya di bawah Kementerian Sumber Manusia dapat mencapai sasaran mewujudkan peluang pekerjaan.

**JAWAPAN**

Tuan Yang di-Pertua,

1. Untuk makluman Ahli-Ahli Dewan Yang Mulia ini, Karnival Penjana Kerjaya yang dilaksanakan oleh Kementerian Sumber Manusia (KSM) di bawah kendalian Pertubuhan Keselamatan Sosial (PERKESO) adalah bertujuan untuk melancarkan lagi proses pencarian kerja dan penempatan pencari kerja.
2. Program Karnival Penjana Kerjaya yang dianjurkan oleh PERKESO telah dapat memudah cara dan membawa majikan-majikan yang mempunyai kekosongan jawatan secara **setempat** (*one stop centre*). Program ini turut memberi peluang kepada sebilangan besar pencari kerja untuk ditemuduga secara langsung oleh majikan yang menyertai program tersebut. Langkah ini akan dapat membantu pencari kerja dalam pencarian kerja mereka dan membantu majikan untuk mendapatkan calon-calon yang diperlukan mengikut keperluan dengan segera.
3. Penganjuran program ini adalah selari dengan inisiatif Kerajaan bagi memastikan semua pencari kerja yang terjejas akibat pandemik COVID19 mendapat pekerjaan lain. Setakat 16 Oktober 2020, sebanyak **205 program** termasuk karnival pekerjaan telah dilaksanakan di seluruh negara termasuk di kawasan luar bandar oleh PERKESO. Program ini melibatkan **504 majikan** dan telah berjaya mencapai sasaran dengan **menempatkan 3,174 pencari kerja**.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK WIRA DR. MOHD HATTA BIN MD.  
RAMLI [ LUMUT ]**

**TARIKH : 12 NOVEMBER 2020 (KHAMIS)**

**SOALAN**

**DATUK WIRA DR. MOHD HATTA BIN MD. RAMLI [ LUMUT ]** minta **MENTERI KESIHATAN** menyatakan berapa jumlah graduan perubatan dari negeri Sarawak dan Sabah setiap tahun, serta berapa peratus daripada jumlah graduan Sabah dan Sarawak yang diberikan lantikan pegawai perubatan tetap setiap tahun.

**JAWAPAN**

**Tuan Yang di-Pertua,**

1. Jumlah graduan perubatan dari Sabah dan Sarawak yang dilantik secara kontrak sejak tahun 2016 sehingga kini adalah seperti berikut:

- (a) tahun 2016 seramai 73 orang merangkumi 33 Sabah dan 40 Sarawak;
- (b) tahun 2017 seramai 467 orang merangkumi 233 Sabah dan 234 Sarawak;
- (c) tahun 2018 seramai 459 orang merangkumi 218 Sabah dan 241 Sarawak;
- (d) tahun 2019 seramai 604 orang merangkumi 308 Sabah dan 296 Sarawak; dan
- (e) tahun 2020 seramai 295 orang merangkumi 78 Sabah dan 217 Sarawak.



2. Tawaran pelantikan secara tetap pula dibuat secara berasingan selepas pegawai menamatkan latihan siswazah dan ditawarkan kepada bakat terbaik yang memenuhi kriteria dan syarat pelantikan tetap.

3. Setakat ini, kohort yang dilantik tetap meliputi kohort tahun 2016 dan 2017 (sehingga Mei) yang telah menamatkan latihan siswazah. Bilangan Pegawai Perubatan dari Sabah dan Sarawak yang telah ditawarkan pelantikan tetap oleh Suruhanjaya Perkhidmatan Awam (SPA) adalah seperti berikut:

- (a) kohort tahun 2016 yang tamat latihan siswazah pada 2018 seramai 31 orang merangkumi 9 Sabah dan 22 Sarawak; dan
- (b) kohort tahun 2017 (sehingga Mei) yang tamat latihan siswazah pada 2019 seramai 80 orang merangkumi 6 Sabah dan 74 Sarawak.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KE-EMPAT BELAS**

**PERTANYAAN : LISAN**

**DARIPADA : PUAN WONG SHU QI [ KLUANG ]**

**TARIKH : 12 NOVEMBER 2020 (KHAMIS)**

**SOALAN**

Minta **MENTERI KEWANGAN** menyatakan status terkini projek pembinaan sistem BRT di Iskandar Malaysia iaitu sama ada projek tersebut diteruskan mengikut jadual ataupun ditunda.

**JAWAPAN**

**Yang di-Pertua,**

1. Untuk makluman Yang Berhormat, Kementerian Pengangkutan bekerjasama rapat dengan Pihak Berkuasa Wilayah Pembangunan Iskandar (IRDA) selaku agensi pelaksana telah melantik perunding utama bagi projek Iskandar Malaysia Bus Rapid Transit (IMBRT) setelah mendapat kelulusan daripada Kementerian Kewangan Malaysia pada 11 November 2019.
2. Projek IMBRT kini berada di peringkat rekabentuk kejuruteraan terperinci. Status pelaksanaan kerja-kerja fizikal setakat akhir bulan September 2020 adalah sebanyak 5.25%.
3. Kerja-kerja pembinaan stesen, hub, laluan bas, pusat kawalan dan depoh akan bermula pada suku ke-dua tahun 2021 (Q2 2021). Untuk makluman, IRDA juga sudah menjalankan Kajian Bagi Impak Lalu Lintas atau Traffic Impact Assessment (TIA) di laluan Skudai dan Iskandar Puteri pada 21 Julai 2020 dan akan melakukan kajian lalu lintas untuk laluan Tebrau sebaik sahaja pintu masuk Johor Bahru – Singapura dibuka untuk mendapatkan keadaan lalu lintas yang sebenar.
4. Pada 23 Jun 2020, Jawatankuasa Perancang Negeri Johor telah bersetuju agar Pihak Berkuasa Tempatan (PBT) mengambil kira dan menyelaraskan kerja-kerja perancangan dan pembangunan termasuk Kebenaran Merancang yang melibatkan jajaran IMBRT.
5. Ujian perintis akan dimulakan pada suku ke-empat 2020 bagi jarak sejauh 4 km dari Horizon Hills ke Anjung, Medini. Ujian ini adalah untuk memperkenalkan kepada agensi-agensi kerajaan dan orang awam mengenai teknologi hijau terkini yang mungkin dapat dilaksanakan di dalam projek BRT serta untuk memudahkan cara proses penilaian kelulusan pelesenan jenis kenderaan (Vehicle Type Approval).
6. Mengikut perancangan, operasi IMBRT dijangka bermula pada hujung tahun 2022.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : TUAN NIK NAZMI BIN NIK AHMAD  
[ SETIAWANGSA ]**

**TARIKH : 12 NOVEMBER 2020 (KHAMIS)**

**SOALAN**

**TUAN NIK NAZMI BIN NIK AHMAD [ SETIAWANGSA ]** minta **MENTERI LUAR NEGERI** menyatakan pendirian negara terhadap penahanan lebih sejuta masyarakat Muslim Uyghur di China dan sekatan terhadap amalan agama mereka sejak tahun 2015.

**JAWAPAN**

**Tuan Yang di-Pertua,**

Saya mengucapkan terima kasih kepada Yang Berhormat Setiawangsa atas pertanyaan yang dikemukakan.

**Tuan Yang di-Pertua,**

2. Sepertimana Yang Berhormat sedia maklum, Kerajaan Malaysia sentiasa peka dan prihatin terhadap isu-isu yang melibatkan kaum minoriti tidak kira di mana jua sekalipun. Ini termasuk isu yang sedang melanda kaum minoriti Islam Uyghur di Xinjiang, China yang sering dilaporkan dan dibincangkan oleh pelbagai pihak.

3. Kerajaan Malaysia sedia maklum bahawa isu mendapat liputan meluas masyarakat antarabangsa. Namun, Kerajaan perlu berhati-hati kerana ia melibatkan urusan dalaman negara China dan adalah menjadi dasar Kerajaan untuk tidak mencampuri urusan dalaman negara-negara lain.

4. Walau bagaimanapun, Kerajaan percaya bahawa pendekatan menerusi dialog dan meningkatkan persefahaman budaya adalah jalan terbaik bagi memastikan pendirian Malaysia terhadap isu-isu kaum minoriti, termasuk Uyghur, dapat diketengahkan dan disampaikan secara konstruktif tanpa menjejaskan hubungan Malaysia dengan negara-negara lain.

5. Bagi mencapai tujuan tersebut, Kementerian Luar Negeri telah membangkitkan perkara ini dalam beberapa siri pertemuan dengan Duta Besar China ke Malaysia. Pada masa yang sama, Kerajaan juga telah menyampaikan pendirian Malaysia semasa pertemuan dua hala antara pegawai-pegawai kanan Kementerian Luar Negeri dengan rakan sejawat mereka dari China.

6. Malah semasa lawatan TYT Wang Yi, Menteri Luar Negeri Republik Rakyat China ke Malaysia pada 13 Oktober 2020 baru-baru ini, perkara ini turut telah disentuh. Malaysia telah menekankan bahawa kaum minoriti turut memainkan peranan penting dalam usaha membangunkan negara. Oleh yang demikian, adalah penting untuk kita meraikan kepelbagaian budaya. Sebaliknya, penindasan ke atas sesuatu kaum hanya akan mencetuskan keganasan dan menimbulkan ketidaktenteraman awam.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK MOHD. AZIS BIN JAMMAN  
[ SEPANGGAR ]**

**TARIKH : 12 NOVEMBER 2020 [ SELASA ]**

**SOALAN**

**DATUK MOHD. AZIS BIN JAMMAN [ SEPANGGAR ]** minta **MENTERI PERTANIAN DAN INDUSTRI MAKANAN** menyatakan berapa jumlah peruntukan yang disalurkan setakat ini bagi pelaksanaan program pembangunan usahawan bimbingan dalam industri pemprosesan asas tani berasaskan produk perikanan bagi manfaat nelayan-nelayan pantai di Sabah.

**JAWAPAN**

**Tuan Yang Dipertua,**

1. Kementerian Pertanian dan Industri Makanan (MAFI) sememangnya memberikan fokus kepada pelaksanaan pelbagai program, projek dan aktiviti termasuk kursus dan latihan bagi meningkatkan taraf hidup kumpulan sasaran untuk menjadi usahawan.
2. Sepanjang RMKe-11 sebanyak RM2 juta telah disalurkan oleh MAFI ke Jabatan Perikanan Sabah bagi tujuan bantuan peralatan pemprosesan kepada pengusaha pemprosesan perikanan di seluruh negeri Sabah.

3. Di samping itu pelbagai kursus dan program telah dilaksanakan bagi meningkatkan pendapatan alternatif seperti menceburi dalam bidang akuakultur dan pemprosesan bagi membantu nelayan untuk meningkatkan kesejahteraan hidup dan menjadi usahawan yang berjaya serta membantu nelayan menangani ketidakstabilan pendapatan terutamanya pada musim tengkujuh. Antara program yang menjurus kepada ini adalah:

- i. Insentif Dan Bantuan bagi Pembangunan Produk Hiliran Dan Keusahawanan;
- ii. Insentif Dan Bantuan bagi Pembangunan Pengusaha Akuakultur Marin Skala Kecil;
- iii. Insentif Dan Bantuan bagi Pembangunan Industri Pembenihan Akuakultur;
- iv. Insentif Dan Bantuan bagi Pembangunan Penternak Dan Komoditi Akuakultur Air Marin Dan Air Tawar;
- v. Bantuan Latihan Penternak Akuakultur;
- vi. Insentif Dan Bantuan bagi Program Pembangunan Rumpai Laut;
- vii. Bantuan kepada golongan sasar bagi peningkatan pengeluaran ikan (touchpoint) kepada penternak akuakultur dan pengusaha produk perikanan di Negeri Sabah. Ini melibatkan bantuan membekalkan peralatan pemprosesan hasil hiliran dan menaiktaraf bengkel usahawan;
- viii. Program melabuhkan tukun tiruan sebanyak 200 unit di sekitar Lahad Datu, Tawau, Tuaran dan Beluran;
- ix. Bantuan peralatan sangkar, benih ikan dan makanan bagi penternak akuakultur di Beluran, Sabah; dan
- x. Pengukuhan Pengurusan Perikanan Melalui Pendekatan Ekosistem (EAFM) di Sandakan, Tawau, Semporna, Kudat dan Pitas.

## **SOALAN NO : 27**

4. Pada tahun 2011 hingga kini, seramai 2,311 orang nelayan telah menerima pelbagai jenis bantuan perikanan di mana seramai 1,145 orang daripadanya adalah penerima yang berdaftar dengan E-kasih.

5. Latihan atau kursus juga diberikan kepada para nelayan yang bertujuan untuk peningkatan kapasiti dan kemahiran para nelayan. Bilangan nelayan yang telah mengikut pelbagai kursus dan latihan in-situ yang dijalankan oleh Jabatan Perikanan Sabah adalah seramai 2,100 orang. Manakala bagi nelayan, isteri nelayan atau ahli keluarga nelayan yang berminat menceburi perusahaan pemprosesan produk perikanan, pada tahun 2011 hingga 2017 seramai 499 orang telah mengikuti pelbagai jenis kursus dan 150 orang telah diberikan bantuan peralatan bagi menjalankan perusahaan yang diceburi.

6. Lembaga Kemajuan Ikan Malaysia (LKIM) juga mempunyai pelbagai program menjurus kepada membantu nelayan meningkatkan pendapatan. Seramai 55 orang usahawan daripada negeri Sabah yang terdiri daripada golongan nelayan yang menjalankan aktiviti hiliran berasaskan perikanan telah mendaftar di bawah Program Usahawan Bimbingan (PUB) LKIM. Kementerian Pertanian Dan Industri Makanan melalui LKIM telah menyalurkan peruntukan sebanyak RM70,500.00 pada tahun 2019, manakala bagi tahun 2020, sebanyak RM251,500.00 telah disalurkan untuk pelaksanaan Program Pembangunan Usahawan Bimbingan LKIM di negeri Sabah.

7. MARDI juga memainkan peranan penting di mana usahawan-usahawan bimbingan ini mendapat latihan secara teori dan amali di MARDI untuk menghasilkan produk-produk perikanan bagi menyokong industri hiliran.

Sekian, terima kasih.



**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE TIGA, PENGGAL KE TIGA  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : YB DATO' NGEH KOO HAM (BERUAS)**

**TARIKH : 12 NOVEMBER 2020 (KHAMIS)**

**SOALAN**

**DATO' NGEH KOO HAM [ BERUAS ]** minta **MENTERI DALAM NEGERI** menyatakan sama ada pihak polis menjalankan siasatan ke atas laporan polisnya, Laporan Polis Pusat Negeri Perak No. 00252/20 dan jika ya, apakah keputusan daripada siasatan tersebut.

**JAWAPAN**

**Tuan Yang Di Pertua,**

Untuk makluman, laporan polis Pusat/2521/20 telah dirujuk ke laporan polis Pusat/2496/20 memandangkan kedua-duanya adalah berkaitan aduan bekas Yang di-Pertua Dewan Undangan Negeri Perak yang tidak berpuas hati setelah dihalau keluar daripada persidangan Dewan Undangan Negeri Perak. Kertas siasatan telah diedarkan ke Jabatan Peguam Negara pada 24 Julai 2020 untuk arahan selanjutnya.

Memandangkan siasatan masih dijalankan serta dalam penelitian Jabatan Peguam Negara, pihak Kementerian tidak berhasrat untuk mengulas dengan lebih lanjut agar tidak mengganggu proses siasatan dan perundangan yang sedang dijalankan.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : TUAN WONG HON WAI [BUKIT BENDERA]**

**TARIKH : 12 NOVEMBER 2020 (KHAMIS)**

**SOALAN**

**TUAN WONG HON WAI [ BUKIT BENDERA ]** minta **MENTERI LUAR NEGERI** menyatakan apakah pandangan pihak Kementerian dalam menangani pencerobohan berterusan agensi penguatkuasa negara asing di Laut China Selatan dan tindakan pihak Kementerian dalam melindungi hak Malaysia di Laut China Selatan.

**JAWAPAN**

**Tuan Yang di-Pertua,**

Saya mengucapkan terima kasih kepada Yang Berhormat Bukit Bendera di atas pertanyaan yang dikemukakan.

**Pendirian Negara**

**Tuan Yang di-Pertua,**

2. Kerajaan Malaysia tegas dalam komitmennya untuk mempertahankan kedaulatan dan hak kedaulatannya di dalam perairan negara, termasuk di Laut China Selatan.

3. Sepertimana Dewan yang mulia ini sedia maklum, isu berkaitan Laut China Selatan merupakan isu yang kompleks berikutan tuntutan-tuntutan bertindih. Oleh yang demikian, isu ini perlu dikendalikan secara menyeluruh dan setiap tindakan yang diambil oleh Kerajaan adalah berdasarkan pertimbangan yang komprehensif.

4. Dalam hal ini, Malaysia komited untuk menyelesaikan isu-isu berkaitan Laut China Selatan secara konstruktif, menggunakan forum dan saluran diplomatik yang sesuai. Pendirian negara juga telah disuarakan secara konsisten di platform-platform antarabangsa dan serantau seperti Pertubuhan Bangsa-bangsa Bersatu dan ASEAN.

5. Untuk makluman Sidang Dewan Yang Mulia, semasa sesi pertemuan di antara saya dengan pihak Menteri Luar Negeri Republik Rakyat China pada 13 Oktober 2020 yang lalu juga, saya telah menyuarakan sekali lagi pendirian Malaysia ini kepada pihak Republik Rakyat China. Pihak Republik Rakyat China juga bersetuju supaya isu berkaitan Laut China Selatan ini diselesaikan secara diplomasi bagi mengelakkan sebarang ketegangan dan ketidakstabilan di rantau ini.

**Tuan Yang di-Pertua,**

**Pemantauan Berterusan**

6. Kementerian, bersama-sama dengan Majlis Keselamatan Negara (MKN), Agensi Penguatkuasaan Maritim Malaysia (APMM) dan Tentera Laut Diraja Malaysia (TLDM) sentiasa komited dan memberikan perhatian yang khusus terhadap keselamatan di kawasan perairan negara. Tindakan yang diambil termasuklah rondaan, pengawasan dan penguatkuasaan yang dilaksanakan secara berterusan, untuk memastikan kedaulatan, hak kedaulatan dan kepentingan negara sentiasa terpelihara.

**Sidang Dewan Yang Mulia,**

7. Kerajaan Malaysia tetap tegas dalam melaksanakan komitmen untuk menjaga kedaulatan dan hak kedaulatan negara. Kerajaan sentiasa mengambil pendekatan berhati-hati bagi mengelakkan sebarang tindakan yang boleh menyebabkan insiden yang tidak diingini berlaku atau meningkatkan ketegangan, dengan izin "*escalation*", di kawasan perairan tersebut.

8. Sehubungan itu, saya ingin menegaskan di dalam Dewan yang mulia ini bahawa Nota Bantahan Diplomatik merupakan hanya salah satu kaedah di mana Malaysia menyuarakan bantahan atau pendirian

kepada mana-mana negara asing berhubung isu-isu spesifik. Selain daripada itu, Kerajaan turut menyuarakan pendirian atau bantahan kepada negara-negara lain dalam platform-platform dua hala, serantau dan antarabangsa. Tindakan tersebut juga adalah selaras dengan undang-undang antarabangsa dan pendirian Malaysia yang mempertahankan hak tuntutan perairan negara daripada sebarang pencerobohan.

9. Untuk menangani sebarang ketegangan di perairan tersebut seperti yang dialami pada tahun ini, pendekatan diplomasi yang konsisten dan berkesan amat diperlukan. Untuk makluman Sidang Dewan Yang Mulia, isu tersebut telah berjaya diselesaikan secara aman tanpa sebarang penggunaan kekerasan atau tindakan ketenteraan yang boleh mengugut keamanan rantau ini.

**Tuan Yang Dipertua,**

10. Selain itu, sebagai langkah untuk memastikan keamanan, kestabilan dan mengelakkan ketegangan di Laut China Selatan, negara-negara ASEAN dan China juga telah memeterai Deklarasi Tatalaku Pihak-pihak Berkepentingan di Laut China Selatan, atau dengan izin, *Declaration on the Conduct of Parties in the South China Sea (DOC)* pada 4 November 2002.

11. Buat masa ini, negara-negara ASEAN dan China sedang merundingkan Kod Tatalaku di Laut China Selatan, atau dengan izin, *Code of Conduct in the South China Sea (COC)*. COC dilihat sebagai satu kod tatacara untuk mengelakkan konflik dan ketegangan di Laut China Selatan. Ianya adalah tanpa prejudis terhadap tuntutan wilayah dan maritim negara masing-masing.

12. Dalam melaksanakan rundingan COC tersebut, Malaysia sentiasa memastikan bahawa COC yang akan dirundingkan tidak sekali-kali mengetepikan kedaulatan dan hak kepentingan negara.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : DATO' SERI HAJI ABDUL HADI  
BIN AWANG [ MARANG ]**

**TARIKH : 12 NOVEMBER 2020 (KHAMIS)**

**SOALAN**

**DATO' SERI HAJI ABDUL HADI BIN AWANG [ MARANG ]** minta **MENTERI LUAR NEGERI** menyatakan apakah perkembangan rundingan membabitkan Laluan Hijau Timbal Balik (RGL) antara Negara Malaysia dan China bagi memudah cara pergerakan rentas sempadan bagi tujuan perniagaan dan lawatan rasmi.

**JAWAPAN**

**Tuan Yang di-Pertua,**

Saya mengucapkan terima kasih kepada Yang Berhormat Marang atas pertanyaan yang dikemukakan.

**Tuan Yang di-Pertua,**

2. Untuk makluman semua ahli Dewan yang mulia ini, pada September yang lalu, Kementerian Luar Negeri telah memulakan perbincangan dengan Kementerian dan Agensi yang berkaitan bagi menimbang dan menilai cadangan mewujudkan *Reciprocal Green Lane* (RGL) dengan negara China.

3. Mesyuarat tersebut secara dasarnya bersetuju untuk mewujudkan RGL dengan China, namun berpandangan bahawa ianya akan hanya dilaksanakan apabila keadaan telah mengizinkan berdasarkan kepada penilaian yang dibuat oleh pihak Kementerian Kesihatan Malaysia.

4. Sehubungan dengan itu, usaha kini sedang dibuat bagi memuktamadkan garis panduan dan prosedur operasi standard (SOP) yang perlu dipatuhi apabila RGL dengan China dilaksanakan. Antara perkara yang sedang diperhalusi adalah tempoh kuarantin, kumpulan sasaran, jenis ujian COVID-19 yang perlu diambil, pintu-pintu masuk yang akan dibuka dan proses pemantauan yang akan dilaksanakan.

5. Sebaik sahaja garis panduan dan SOP ini telah ditetapkan, maka Kerajaan akan memulakan rundingan dengan Kerajaan China bagi memuktamadkannya berdasarkan kepada prinsip timbal balas. Apabila kedua-dua pihak telah mencapai persetujuan, pelaksanaannya pula akan bergantung kepada kesiapsiagaan semua agensi pelaksana di kedua-dua negara.

**Tuan Yang di-Pertua,**

6. Sebagai makluman, cadangan mewujudkan RGL antara Malaysia dan China turut telah dibincangkan semasa lawatan rasmi Penasihat Negara merangkap Menteri Luar Negeri China, TYT Wang Yi ke Malaysia pada 12–13 Oktober 2020 baru-baru ini. Secara dasarnya, kedua-dua negara telah bersetuju untuk melaksanakan RGL ini apabila keadaan mengizinkan.

7. Izinkan saya tekankan di sini bahawa Kerajaan akan sentiasa mengambil langkah berhati-hati dalam melaksanakan RGL ini bagi memastikan kesihatan dan keselamatan orang awam sentiasa terpelihara serta dilindungi.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE TIGA, PENGGAL KE TIGA,  
PARLIMEN KEEMPATBELAS**

---

**PERTANYAAN : JAWAB LISAN**

**DARIPADA : YB TUAN CHANG LIH KANG (TANJONG MALIM)**

**TARIKH : 12 NOVEMBER 2020 (KHAMIS)**

**SOALAN**

**TUAN CHANG LIH KANG [ TANJONG MALIM ]** minta **MENTERI DALAM NEGERI** menyatakan status siasatan kes Menteri Perusahaan Perladangan dan Komoditi yang melanggar arahan kuarantin wajib.

**JAWAPAN**

**Tuan Yang Di Pertua,**

Untuk makluman, pihak PDRM telah menerima sebanyak 27 laporan polis ke atas YB Menteri Perusahaan Perladangan dan Komoditi yang didakwa tidak menjalani kuarantin selepas balik dari luar negara. Siasatan telah dijalankan bersabit Sri Petaling Repot 5634/2020 bertarikh 19 Ogos 2020 di bawah Seksyen 22 (b) Akta Pencegahan dan Pengawalan Penyakit Berjangkit 1988 (Akta 342).

Kertas siasatan telah dikemukakan kepada Pejabat Peguam Negara yang mempunyai bidang kuasa mutlak untuk keputusan selanjutnya.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : PUAN NOORITA BINTI SUAL [ TENOM ]**

**TARIKH : 12 NOVEMBER 2020 (KHAMIS)**

**SOALAN**

**PUAN NOORITA BINTI SUAL [ TENOM ]** minta **MENTERI KESIHATAN** menyatakan di bawah Kerajaan yang baru ini apakah langkah-langkah yang telah diambil oleh Kementerian dalam mengatasi kekurangan kakitangan dan kemudahan dan seterusnya menaik taraf hospital di negeri Sabah terutamanya dalam menghadapi gelombang ketiga COVID-19.



**JAWAPAN**

Tuan Yang di-Pertua,

1. KKM sentiasa memandang serius situasi penularan pandemik COVID-19 khususnya di negeri Sabah sejak awal peningkatan bilangan kes yang bermula pada awal September 2020. Pelbagai usaha telah dijalankan seperti meningkatkan kapasiti fasiliti hospital dan mobilisasi aset serta sumber manusia. Usaha-usaha ini dilakukan bagi memastikan sistem rawatan kesihatan di negeri Sabah terus mampan dalam membendung penularan COVID-19. KKM membahagikan dua (2) Pelan Tindakan Pengurusan iaitu bagi Pesakit COVID-19 dan Pesakit Bukan COVID-19.

2. Bagi **Pelan Tindakan Pengurusan Pesakit COVID-19**, KKM telah meningkatkan kapasiti katil di hospital COVID-19 serta Pusat Kuarantin dan Rawatan Berisiko Rendah (PKRC), katil ICU, ventilator, kapasiti ujian makmal dan sumber manusia:

- i. Pada masa ini, Sabah mempunyai **9 Hospital COVID-19 dan 26 PKRC** dan jumlah **katil hospital COVID-19 dan PKRC telah ditingkatkan sebanyak 14 kali ganda iaitu** daripada 410 katil kepada 5,756 katil. Kadar penggunaan katil pada ketika ini adalah berada ditahap 39%;
- ii. **Jumlah katil ICU di negeri Sabah adalah sebanyak 127 unit di mana kadar penggunaannya adalah pada tahap 78%** berbanding 60 unit katil ICU dengan kadar penggunaan hanya 7% sahaja pada awal September 2020.
- iii. Bagi menampung peningkatan penggunaan katil ICU di Sabah, **beberapa kawasan klinikal di hospital telah diubahsuai dan disusun atur semula bagi tujuan rawatan terhadap pesakit yang memerlukan penjagaan kritikal (repurposing of clinical areas)**.
- iv. Terkini, terdapat 193 unit ventilator yang disediakan di mana kadar penggunaannya adalah pada tahap 37%. Penambahan jumlah ventilator ini adalah melalui peruntukan khas kerajaan dan hasil sumbangan pelbagai pihak.

- v. Meningkatkan kapasiti ujian makmal RT-PCR dan RTK Antigen.
- vi. Meningkatkan kapasiti dan mobilisasi tenaga sumber manusia Perubatan dan Kesihatan Awam

3. Manakala, bagi **Pelan Tindakan Pengurusan Pesakit Bukan COVID-19**, KKM melaksanakan Penyumberluaran (*outsourcing*) perkhidmatan Perubatan bagi kes-kes bukan COVID-19:

- i. Untuk memastikan kelangsungan perkhidmatan dan rawatan kepada kes-kes bukan COVID-19 tidak terjejas, Jabatan Kesihatan Negeri Sabah telah berbincang dan menandatangani perjanjian dengan beberapa buah hospital swasta di Sabah untuk menyumberluar perkhidmatan kesihatan.
- ii. Terdapat 6 buah hospital KKM di Sabah yang terlibat dengan penyumberluaran perkhidmatan perubatan di Sabah yang meliputi 12 disiplin seperti berikut:
  - a) *Paediatric Cardiology*
  - b) *Paediatric Surgery*
  - c) *Vascular Surgery*
  - d) *Gynaecology*
  - e) *Hepatobiliary Surgery*
  - f) *Orthopedic*
  - g) *Urology*
  - h) *Cardiology*
  - i) *Radiology*
  - j) *Ophthalmology*
  - k) *Cardiothoracic Surgery*
  - l) *Neurosurgery*
- iii. Beberapa buah hospital swasta di Sabah telah dikenal pasti untuk menjalankan 1,833 pembedahan dan prosedur.

Setakat ini 30 kes radiologi, 3 kes pembedahan neuro dan 4 kes kardiologi telah mula dihantar ke Hospital swasta bagi mendapatkan rawatan.

**Tuan Yang Di-Pertua,**

4. **Penubuhan Hospital Medan di Tawau dengan kapasiti 100 katil mula dibangunkan di Kompleks Sukan Tawau pada 16 Oktober 2020.** Hospital ini adalah hasil kerjasama KKM dengan pihak Angkatan Tentera Malaysia (ATM) bertujuan membantu Hospital Tawau dalam merawat kes-kes bukan COVID-19 terutamanya kes kecemasan yang memerlukan pembedahan dan juga kes Pediatrik dan Obstetrik dan Ginekologi.

- i. Hospital ini mula beroperasi sejak 20 Oktober 2020 dengan permulaan kemasukan pesakit bukan COVID-19 sebanyak 4 orang; dan
- ii. Diharapkan dengan adanya hospital ini, lebih banyak katil di Hospital Tawau boleh digunakan untuk pesakit COVID-19 dan juga kelangsungan rawatan pembedahan terhadap pesakit bukan COVID-19 dapat diteruskan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE TIGA, PENGGAL KE TIGA,  
PARLIMEN KEEMPATBELAS**

---

**PERTANYAAN : JAWAB LISAN**

**DARIPADA : YB PUAN TERESA KOK SUH SIM (SEPUTEH)**

**TARIKH : 12 NOVEMBER 2020 (KHAMIS)**

**SOALAN**

**PUAN TERESA KOK SUH SIM [ SEPUTEH ]** minta **MENTERI DALAM NEGERI** menyatakan cara Jabatan Imigresen menangani pendatang asing tanpa izin yang sakit termasuk penyakit COVID-19 dan ingin pulang ke negara asal mereka. Apakah penambahbaikan yang telah dilakukan di pusat tahanan imigresen selepas berlakunya peningkatan kes jangkitan wabak COVID-19.

**JAWAPAN**

**Tuan Yang Di Pertua,**

Mohon izin supaya soalan daripada YB Seputeh ini dijawab bersekali dengan soalan bernombor 12814 daripada YB Johor Bahru memandangkan kedua-dua soalan yang diutarakan menyentuh isu yang sama iaitu tindakan mencegah penularan wabak COVID-19 di Depot Tahanan Imigresen dalam kalangan tahanan.

Untuk makluman Ahli Yang Berhormat, Kementerian Dalam Negeri (KDN) sentiasa memandang serius berkenaan isu Pendatang Asing Tanpa Izin (PATI) di negara ini terutamanya semasa krisis dan penularan pandemik COVID-19 di seluruh dunia pada ketika ini. Sepertimana Ahli Yang Berhormat sedia maklum, Op Benteng dilaksanakan sepanjang tempoh Perintah Kawalan Pergerakan (PKP) dikuatkuasakan secara bersepadu melalui kerjasama pelbagai Agensi / Jabatan seperti Polis Diraja Malaysia

## SOALAN NO : 34

(PDRM) melalui Pasukan Gerakan Am (PGA) dan Angkatan Tentera Malaysia (ATM) yang mana ditugaskan untuk menyekat kemasukan PATI dan aktiviti penyeludupan. Bermula dari 1 Mei 2020 sehingga 2 November 2020, Op Benteng telah merekodkan tangkapan berjumlah 7,928 orang PATI dari pelbagai warganegara.

KDN melalui Jabatan Imigresen Malaysia (JIM) turut sentiasa memastikan tahap kesihatan yang baik di kalangan tahanan di Depot Tahanan Imigresen. Dengan peningkatan jumlah tahanan sepanjang tempoh Perintah Kawalan Pergerakan (PKP), pihak JIM mengambil langkah-langkah mengekang penularan wabak COVID-19 di kalangan tahanan dengan mewujudkan *Standard Operating Procedure* (SOP) termasuk mewajibkan saringan COVID-19 ke atas semua tahanan baharu yang memasuki Depot Tahanan Imigresen.

Selain itu, saringan gejala seperti demam, batuk dan selsema akan dilaksanakan secara berkala terhadap semua tahanan oleh Penolong Pegawai Perubatan yang bertugas di Depot Tahanan Imigresen. Tahanan yang mempunyai gejala akan diasingkan dan segera dibawa ke hospital atau klinik terdekat bagi mendapatkan rawatan. Pihak JIM turut mendapatkan kerjasama daripada Jabatan Penjara Malaysia untuk menggunakan fasiliti penjara dan fasiliti lain bagi tujuan penempatan tahanan imigresen untuk mengelakkan kesesakan yang terlalu tinggi di Depot Tahanan Imigresen sedia ada.

Bagi memastikan tahap kesihatan para tahanan sentiasa dalam keadaan baik, pihak JIM bekerjasama dengan Kementerian Kesihatan Malaysia (KKM) untuk menempatkan Penolong Pegawai Perubatan di Depot Tahanan Imigresen di seluruh negara bagi memberikan rawatan awal kepada tahanan. Klinik kesihatan yang berhampiran telah dikenalpasti dan dipilih oleh KKM bagi memperkukuh perkhidmatan kesihatan di Depot Tahanan Imigresen serta berperanan sebagai pusat rujukan oleh Penolong Pegawai Perubatan yang dilantik dan sebagai pembekal keperluan perubatan ke depot-depot. Pemantauan kesihatan secara berkala turut dilakukan oleh KKM ke Depot Tahanan Imigresen dari semasa ke semasa.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE TIGA, PENGGAL KE TIGA,  
PARLIMEN KEEMPATBELAS**

---

**PERTANYAAN : JAWAB LISAN**

**DARIPADA : DATO' SERI DR. AHMAD ZAHID BIN HAMIDI  
[BAGAN DATUK]**

**TARIKH : 12 NOVEMBER 2020 (KHAMIS)**

**SOALAN**

**DATO' SERI DR. AHMAD ZAHID BIN HAMIDI [ BAGAN DATUK ]** minta **MENTERI DALAM NEGERI** menyatakan apakah tindakan yang telah diambil ke atas individu yang mengeluarkan kenyataan berunsur fitnah mengatakan bahawa tragedi pencerobohan di Lahad Datu pada 2013 adalah satu sandiwara.

**JAWAPAN**

**Tuan Yang Di Pertua,**

Untuk makluman, pihak PDRM telah memulakan siasatan ke atas dakwaan oleh YB Datuk Mohammadin Ketapi bahawa tragedi pencerobohan di Lahad Datu pada 2013 sebagai satu sandiwara. Siasatan dibuat bersabit Lahad Datu repot 6031/2020 bertarikh 21 September 2020 di bawah seksyen 505(b) Kanun Keseksaan iaitu menyebabkan ketakutan atau kegentaran awam atau kepada mana-mana golongan awam dan seksyen 233 Akta Komunikasi dan Multimedia iaitu penggunaan tidak wajar kemudahan rangkaian atau perkhidmatan rangkaian. Buat masa ini, pihak polis masih dalam proses mendapatkan keterangan saksi bagi melengkapi kertas siasatan.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEDUA,  
PARLIMEN KEEMPAT BELAS**

**PERTANYAAN : LISAN**

**DARIPADA : PUAN HAJAH FUZIAH BINTI  
SALLEH [ KUANTAN ]**

**TARIKH : 12 NOVEMBER 2020 (KHAMIS)**

**SOALAN**

Minta **MENTERI PERTANIAN DAN INDUSTRI MAKANAN** menyatakan tindakan yang diambil oleh Kementerian berhubung isu yang dihadapi pekebun Musang King di negeri Pahang dan apakah dasar yang telah digubal untuk membantu meningkatkan industri tani ini.

**JAWAPAN**

**Tuan Yang Dipertua,**

1. Kementerian mengambil maklum kemelut yang dihadapi oleh pekebun durian Musang King di negeri Pahang. Namun, perkara ini adalah di bawah bidang kuasa Kerajaan Negeri kerana melibatkan hal ehwal tanah Kerajaan Negeri.
2. Bagi membantu dan memperkasakan lagi industri ini, Kementerian telah mempergiat perluasan kawasan melalui Pelaksanaan Program Transformasi Ladang di bawah Projek Pembangunan Kluster Durian dan Sumber Kekayaan Baru bagi memenuhi permintaan tempatan atau eksport sama ada dalam bentuk segar atau diproses.
3. Pengeluaran durian negara dijangka meningkat kepada 443,000 metrik tan menjelang 2030 berdasarkan saiz kawasan tanaman durian tahun 2019. Sehingga tahun 2019, kawasan penanaman durian di Malaysia adalah seluas 72,536 hektar dengan pengeluaran sebanyak 348,170 metrik tan. Sebanyak 204 varieti durian telah didaftarkan di bawah Jabatan Pertanian dan di antara varieti durian yang mendapat sambutan penggemar durian ialah varieti Durian Raja Kunyit (D197) atau lebih dikenali dengan nama Musang King, D24, Hajah Hasmah atau IOI (D168), Udang Merah (D175) dan Duri Hitam (D200).
4. Kementerian telah menyediakan platform pemasaran yang luas untuk industri durian apabila Malaysia dibenarkan untuk mengeksport durian sejuk beku dalam bentuk biji ke China berbanding sebelum ini, hanya durian dalam bentuk *pulp* dan *paste* sahaja yang boleh dieksport ke China. Sehubungan dengan itu, ladang yang membekalkan durian dan fasiliti pemprosesan durian perlu berdaftar dengan Jabatan Pertanian (DOA) serta mempunyai sijil MyGAP.

Sekian, terima kasih.



**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE TIGA, PENGGAL KE TIGA,  
PARLIMEN KEEMPATBELAS**

---

**PERTANYAAN : JAWAB LISAN**

**DARIPADA : YB TUAN PANG HOK LIONG (LABIS)**

**TARIKH : 12 NOVEMBER 2020 (KHAMIS)**

**SOALAN**

**TUAN PANG HOK LIONG [ LABIS ]** minta **MENTERI DALAM NEGERI** menyatakan pihak Menteri sendiri pernah mengatakan akan cari Jho Low yang dikehendaki pihak berkuasa dalam siasatan berhubung skandal 1MDB, sampai ke lubang cacing dan pada bulan Mac 2020, pihak PDRM melahirkan keyakinannya bahawa pihak Menteri juga dapat membawa pulang Jho Low. Bilakah Jho Low akan dibawa pulang.

**JAWAPAN**

**Tuan Yang Di Pertua,**

Low Taek Jho atau dikenali sebagai Jho Low dan bapanya Low Hock Peng dikehendaki oleh pihak berkuasa negara ini bagi membantu siasatan berhubung syarikat 1Malaysia Development Berhad (1MDB). Kedua-dua individu ini dipercayai berada di luar negara dan usaha mengesan dan membawa balik mereka ke Malaysia masih diteruskan.

Ketua Polis Negara juga telah beberapa kali membuat kenyataan melalui media mengenai komitmen pihak PDRM untuk membawa balik Jho Low ke Malaysia bagi menghadapi pertuduhan jenayah di mahkamah.

Pada 24/08/2018 dan 4/12/2018, pihak PDRM telah memfailkan 13 pertuduhan di bawah Seksyen 4(1)(A), Akta Pencegahan Pengubahan Wang Haram, Pencegahan Pembiayaan Keganasan dan Hasil daripada Aktiviti Haram 2001 terhadap Jho Low di Mahkamah Putrajaya dan Mahkamah Kuala Lumpur melibatkan kes 1MDB. Selain daripada itu, *Red Notice* (Fugitive *Wanted for Prosecution*) juga telah dikeluarkan oleh Interpol ke atas Jho Low dan *Red Notice* tersebut masih aktif dan berkuatkuasa sehingga ke hari ini.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : DATUK ROZMAN BIN ISLI [ LABUAN]**

**TARIKH : 12 NOVEMBER 2020 (KHAMIS)**

**SOALAN**

Minta **MENTERI PENGANGKUTAN** menyatakan adakah Kementerian sedar bahawa feri-feri kenderaan dan penumpang di Labuan masih tidak mempunyai sistem penjualan tiket secara atas talian dan ianya mengecewakan pengguna kerana tidak memudahkan mereka merancang perjalanan. Bolehkah ianya dijadikan syarat wajib oleh pihak Kementerian kepada pemegang lesen.

**JAWAPAN**

Yang di-Pertua,

1. Tinjauan yang telah dibuat oleh pihak Kementerian Pengangkutan, adalah didapati terdapat masalah-masalah yang dihadapi oleh pengguna-pengguna perkhidmatan feri di Labuan terutamanya yang berkait rapat dengan isu penjualan tiket. Dalam hubungan ini, Kementerian amat prihatin dengan permasalahan yang berlaku dan menyokong supaya masalah tersebut diatasi sebaik mungkin melalui kaedah penjualan tiket secara atas talian.
2. Untuk makluman Yang Berhormat, buat masa ini tiada peruntukan undang-undang di bawah Kementerian Pengangkutan atau Jabatan Laut Malaysia yang mewajibkan pengusaha feri melaksanakan penjualan tiket secara atas talian. Walau bagaimanapun, cadangan ini boleh diusulkan melalui perbincangan di dalam sesi perjumpaan berkala antara pihak Kerajaan dengan pengusaha-pengusaha feri bagi mengatasi isu penjualan tiket feri ini. Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE TIGA, PENGGAL KE TIGA,  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : YB DATO' NGEH KOO HAM (BERUAS)**

**TARIKH : 12 NOVEMBER 2020**

**SOALAN**

**DATO' NGEH KOO HAM [ BERUAS ]** minta **MENTERI DALAM NEGERI** menyatakan mengapa polis membuat keputusan bahawa kes dalam laporan polisnya, Laporan Pusat/002496/20, Ipoh, Perak merupakan satu kes yang tidak boleh ditangkap pada hal ia merupakan satu laporan terhadap sekumpulan orang yang mencerobohi Dewan Negeri Perak dan mengugut secara paksa untuk mengusung Yang di-Pertua Dewan Negeri keluar dari Dewan Negeri.

**JAWAPAN**

**Tuan Yang Di Pertua,**

Pihak Polis Diraja Malaysia (PDRM) telah menjalankan siasatan berkaitan Pusat repot 2496/20 bertarikh 12 Mei 2020 berhubung bekas Yang Di-Pertua Negeri Perak yang tidak berpuas hati atas tindakan dihalau keluar daripada persidangan Dewan Undangan Negeri Perak. Hasil siasatan mendapati bahawa tiada elemen jenayah dalam kes ini, oleh kerana sekumpulan lelaki yang dinyatakan oleh pengadu adalah sebenarnya kakitangan Kerajaan Negeri Perak yang bertugas menjaga keselamatan dan mengawal keadaan di dalam dewan tersebut. Kertas siasatan telah dikemukakan kepada Pejabat Peguam Negara pada 22 Julai 2020 untuk arahan selanjutnya.

Memandangkan siasatan masih dijalankan serta berada dalam penelitian Jabatan Peguam Negara, pihak Kementerian tidak berhasrat untuk mengulas dengan lebih lanjut berkaitan kes ini supaya tidak mengganggu proses siasatan dan perundangan.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : TUAN WONG HON WAI [ BUKIT BENDERA ]**

**TARIKH : 12 November 2020 (KHAMIS)**

**SOALAN**

**TUAN WONG HON WAI [ BUKIT BENDERA ]** minta **MENTERI LUAR NEGERI** menyatakan apakah status 'ASEAN travel bubble' yang dinyatakan oleh Menteri dan apakah peluang serta cabaran daripada perancangan tersebut.

**JAWAPAN**

**Tuan Yang di-Pertua,**

Saya mengucapkan terima kasih kepada Yang Berhormat Bukit Bendera atas pertanyaan yang dikemukakan.

2. Untuk makluman Dewan yang mulia ini, semasa Sidang Kemuncak ASEAN ke-36 pada 26 Jun 2020, YAB Perdana Menteri telah menyatakan sokongan Kerajaan ke atas inisiatif untuk memperkenalkan "ASEAN Travel Bubble" antara Negara-negara ASEAN yang dikategorikan sebagai Negara Hijau. Inisiatif ini bertujuan untuk menyokong pemulihan ekonomi Anggota Negara ASEAN dalam meningkatkan pelaburan, menciptakan peluang-peluang pekerjaan dan memudahkan aktiviti pelancongan intra-ASEAN.

3. Sebagai tindakan susulan kepada keputusan Sidang Kemuncak ASEAN Ke-36 tersebut, Kementerian Luar Negeri Indonesia telah mencadangkan supaya suatu deklarasi oleh Ketua-Ketua Negara/Kerajaan Negara Anggota ASEAN mengenai penubuhan suatu

rangka kerja bagi '*ASEAN Travel Corridor Arrangement*' dimeterai semasa Sidang Kemuncak ASEAN Ke-37 yang akan diadakan secara persidangan video pada 11-15 November 2020.

4. Pada masa ini, draf deklarasi tersebut sedang dirunding oleh Negara-negara Anggota ASEAN untuk dimuktamadkan sebelum Sidang Kemuncak tersebut bermula pada November ini.

5. Rangka kerja tersebut dijangka akan menekankan kepentingan mematuhi protokol kesihatan dalam menentukan prosedur-prosedur perjalanan yang bakal diperkenalkan bagi melindungi kesejahteraan dan keselamatan warga Negara-negara Anggota ASEAN daripada wabak COVID-19 ini. Antara cabaran yang dihadapi ialah untuk menyelaraskan SOP (*Standard Operating Procedures*) bagi kemasukan warga ASEAN ke negara-negara anggota.

6. Sekiranya dipersetujui oleh Ketua-Ketua Negara/Kerajaan Negara-Negara Anggota ASEAN, suata rangka kerja akan diwujudkan bagi memudahcara perjalanan pegawai-pegawai Kerajaan dan ahli-ahli perniagaan di antara Negara-negara ASEAN bagi tujuan urusan rasmi dan melibatkan urusan transaksi perniagaan yang penting.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE TIGA, PENGGAL KE TIGA,  
PARLIMEN EMPATBELAS**

---

**PERTANYAAN : JAWAB LISAN**

**DARIPADA : YB TUAN DR DZULKEFLY B. AHMAD  
(KUALA SELANGOR)**

**TARIKH : 12 NOVEMBER 2020 (KHAMIS)**

**SOALAN**

**DATUK SERI DR. HAJI DZULKEFLY BIN AHMAD [ KUALA SELANGOR ]** minta **MENTERI DALAM NEGERI** menyatakan apakah pertimbangan utama Kerajaan yang berhasrat untuk meminda Akta Penagih Dadah (Rawatan dan Pemulihan) 1983 kepada Akta Penyalahgunaan Dadah dan Bahan bagi menempatkan penagih dadah di AADK dan bukannya di penjara lagi.



**JAWAPAN**

**Tuan Yang Di Pertua,**

Mesyuarat Jawatankuasa Bertindak Penguatkuasaan Undang-Undang yang telah dipengerusikan oleh Menteri Dalam Negeri pada 21 Julai 2020 bersetuju bahawa suatu dasar pengalihan penyalahguna dadah dari hukuman penjara ke program rawatan dan pemulihan dadah perlu dilaksanakan. Mesyuarat juga bersetuju supaya dasar pengalihan ini diperhalusi dalam Akta baharu yang dikenali sebagai Akta Penyalahgunaan Dadah dan Substan bagi menggantikan Akta Penagih Dadah (Rawatan dan Pemulihan) 1983.

Tujuan utama dasar pengalihan penyalahguna dadah dan penggubalan akta baharu adalah untuk meningkatkan akses mendapatkan rawatan dan pemulihan dadah bagi mereka yang memerlukannya supaya mereka dapat kembali kepada masyarakat.

Kementerian Dalam Negeri melalui Agensi Antidadah Kebangsaan telah mengadakan beberapa siri mesyuarat dan bengkel bersama Kementerian / Jabatan / Agensi yang berkaitan, terutamanya yang terlibat dalam usaha menangani masalah dadah bagi mendapatkan input dan cadangan penggubalan Akta baharu tersebut. Pada masa ini, kesemua input yang dikumpul sedang diselaras dan dimurnikan untuk penyediaan draf Rang Undang-Undang.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : YB TUAN M. KULASEGARAN [ IPOH BARAT ]**

**TARIKH : 12 NOVEMBER 2020 (KHAMIS)**

**SOALAN**

**TUAN M. KULASEGARAN [IPOH BARAT] minta MENTERI SUMBER  
MANUSIA menyatakan:**

- a) angka pengangguran terkini; dan
- b) nyatakan secara terperinci situasi yang akan terjadi kepada pasaran pekerjaan untuk jangka masa pendek dan panjang.

**JAWAPAN**

**Tuan Yang di-Pertua,**

1. Untuk makluman Ahli-Ahli Dewan Yang Mulia ini, kadar pengangguran bagi suku pertama tahun 2020 adalah 3.5%, manakala kadar pengangguran bagi suku kedua tahun 2020 meningkat kepada 5.1%.
2. Pada pandangan Kerajaan, situasi pasaran pekerjaan sedang dalam proses pemulihan susulan beberapa siri Perintah Kawalan Pergerakan (PKP) yang bermula pada 18 Mac 2020. Ini dapat dilihat dari data kadar pengangguran bulanan dari bulan Mac 2020 sehingga Ogos 2020 pada kadar bulanan 3.9%, 5.0%, 5.3%, 4.9% dan 4.7%.
3. Walaupun kadar pengangguran tahun 2020 agak tinggi, Kerajaan menjangkakan situasi ini akan semakin berubah pada bulan-bulan akan datang dan seterusnya pada tahun hadapan. Ini adalah kerana siri PKP yang dilaksanakan sejak awal tahun telah menyebabkan kekurangan aktiviti ekonomi, yang seterusnya menyebabkan peningkatan kadar pengangguran pada kadar 5.3% pada bulan Mei 2020.
4. Walau bagaimanapun, pembukaan sektor-sektor ekonomi mulai bulan Jun 2020 telah menurunkan trend kadar pengangguran kepada kadar 4.7% pada bulan Ogos 2020. Kerajaan menjangkakan kadar pengangguran akan terus menurun.
5. Seterusnya, untuk membantu mengurangkan beban industri dan menjamin kelangsungan pekerjaan bagi tenaga kerja Malaysia dalam jangka masa pendek, Kerajaan telah memperkenalkan insentif Pakej Rangsangan Ekonomi dan Pelan Jana Ekonomi Negara (PENJANA).
6. Antara inisiatif yang diperkenalkan adalah terdiri daripada lima (5) inisiatif PENJANA berkaitan sumber manusia seperti berikut:

## SOALAN NO : 42

- (i) Pertama, **Program Subsidi Upah** merupakan bantuan kewangan yang dibayar kepada majikan setiap perusahaan bagi setiap pekerja tempatan yang bergaji RM4,000 dan ke bawah
- (ii) Kedua, **Menaik Taraf Portal Perkhidmatan Pekerjaan Negara** bertujuan untuk memperkukuh portal pekerjaan dan padanan kerja serta bekerjasama dengan portal pekerjaan swasta untuk padanan kerja
- (iii) Ketiga, **Program Insentif Pengambilan Pekerja dan Bantuan Latihan** bagi menggalakkan pengambilan pekerja dengan menyediakan insentif kewangan kepada majikan
- (iv) Keempat, **Program Kemahiran dan Peningkatan Kemahiran** bagi meningkatkan kebolehpasaran golongan penganggur melalui program latihan untuk mendapat kemahiran dan meningkatkan kemahiran
- (v) Kelima, **Perlindungan Sosial dan Latihan bagi Pekerja Ekonomi Gig** bagi menjamin keselamatan sosial dan kebajikan golongan pekerja ekonomi gig.

7. Untuk memastikan peluang pekerjaan terus di cipta dalam bulan-bulan yang akan datang, dan bagi mewujudkan lebih banyak peluang pekerjaan kepada rakyat Malaysia yang kehilangan pekerjaan, beberapa inisiatif sedang dan akan dilaksanakan oleh Kerajaan. Antaranya adalah:

- (i) meningkatkan pelaburan nilai tinggi melalui *Foreign Direct Investment* (FDI) dan *Domestic Direct Investment* (DDI) bagi meningkatkan penghasilan pekerjaan yang bersifat *high value jobs* dan *knowledge worker* (k-worker) agar kadar upah yang tinggi dapat dinikmati oleh golongan ini;

## SOALAN NO : 42

- (ii) melaksanakan latihan-latihan kemahiran yang bersifat *internship* seperti Sistem Latihan Dual Nasional (SLDN) untuk meningkatkan kebolehpasaran pelajar;
- (iii) menyediakan insentif-insentif untuk syarikat bagi memperbanyakkan elemen-elemen berteknologi tinggi yang dijangka akan meningkatkan jumlah peluang pekerjaan berkemahiran tinggi; dan
- (iv) mengadakan sesi libat urus bersama industri bagi membincangkan isu sekaligus mengambil langkah-langkah untuk mengurangkan kebergantungan terhadap pekerja asing.

8. Bagi menyokong usaha-usaha di atas, Kerajaan harus menyediakan pekerja-pekerja berkemahiran yang memenuhi keperluan industri. Sehubungan itu, beberapa langkah sedang diambil oleh Kementerian, antaranya:

- (i) Pertama, program *upskilling* dan *reskilling* disediakan kepada golongan pekerja bagi mempertingkatkan kemahiran mereka bagi menyesuaikan diri dengan perubahan keperluan kerja masa hadapan serta persekitaran global yang semakin kompetitif dan dinamik. Program *upskilling* dan *reskilling* dilaksanakan secara berterusan supaya kemahiran yang diperolehi sentiasa bersesuaian dengan keperluan industri semasa;
- (ii) Kedua, Kementerian Sumber Manusia (KSM) melalui Jabatan Pembangunan Kemahiran (JPK), telah membangunkan *National Occupational Skills Standard* (NOSS) bagi 21 sektor ekonomi. NOSS ini telah menjadi rujukan dalam pembangunan program latihan di institusi-institusi latihan awam dan swasta mengikut tahap kemahiran yang diperlukan. NOSS yang dibangunkan dan dipantau secara bersama dengan *Industry*

*Lead Body* (ILB) adalah mengikut keperluan industri dan teknologi terkini;

- (iii) Ketiga, memperluaskan akses kepada warganegara untuk mendapat Latihan dan Pendidikan Teknikal dan Vokasional (TVET). Sehingga kini, terdapat lima ratus enam puluh dua (562) buah Institusi Latihan Kemahiran Awam (ILKA) yang telah ditubuhkan di seluruh negara dengan pelbagai kursus kemahiran ditawarkan mengikut keperluan industri; dan
- (iv) Keempat, KSM dan Kementerian Pengajian Tinggi (KPT) telah diberikan peranan sebagai Pengerusi bersama bagi menerajui Jawatankuasa Kerja Pembangunan Kemahiran dan Bakat (TWG-S) Industry4WRD. Jawatankuasa ini berperanan mengenal pasti keperluan pasaran buruh dan kemahiran yang diperlukan serta menyelaraskan dan melaksanakan usaha-usaha dalam memperkukuhkan kompetensi sumber manusia bagi menghadapi Industri 4.0. Usaha ini dapat dilakukan melalui program *upskilling* dan *reskilling* yang disediakan kepada golongan pelajar kemahiran dan pekerja bagi mempertingkatkan kemajuan sendiri dalam menyesuaikan diri dengan perubahan keperluan kerja masa hadapan (*future jobs*) serta persekitaran global yang semakin kompetitif dan dinamik.

9. Kesimpulannya, melalui sokongan dan kerjasama erat semua pihak terlibat, usaha-usaha yang akan dan telah dilaksanakan oleh Kerajaan di jangka akan dapat mengurangkan lagi kadar pengangguran sedia ada iaitu 4.7% (data sehingga Ogos 2020).

Sekian, terima kasih

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPATBELAS**

---

**PERTANYAAN : JAWAB LISAN**

**DARIPADA : YB DATO' SRI RICHARD RIOT ANAK JAEM  
(SERIAN)**

**TARIKH : 12 NOVEMBER 2020 (KHAMIS)**

**SOALAN**

**DATO' SRI RICHARD RIOT ANAK JAEM [ SERIAN ]** minta **MENTERI DALAM NEGERI** menyatakan bilangan 'stateless people' mengikut bahagian-bahagian pentadbiran di Sarawak dan bilangan yang telah berjaya dianugerahkan Sijil Kewarganegaraan Malaysia.

**JAWAPAN**

**Tuan Yang Di-Pertua,**

Berhubung dengan rekod individu tanpa kewarganegaraan (*stateless people*), adalah dimaklumkan bahawa Kementerian Dalam Negeri melalui Jabatan Pendaftaran Negara (JPN) hanya menyimpan rekod bagi individu yang mendaftar di JPN bagi urusan Kelahiran dan Kematian, Kad Pengenalan, Kewarganegaraan, dan Perkahwinan dan Perceraian (bagi pasangan beragama Bukan Islam). Dalam hal ini, JPN tidak merekodkan individu yang mendakwa dirinya tidak memiliki taraf kewarganegaraan mana-mana negara (*stateless*).

Sukacita Kementerian ingin menjelaskan bahawa istilah *stateless* tidak boleh disalah ertikan dengan istilah Bukan Warganegara, yang merujuk kepada individu yang tidak bertaraf sebagai warganegara Malaysia. Lazimnya individu Bukan Warganegara ini mempunyai hak atau tuntutan terhadap kewarganegaraan negara lain, namun mereka tidak bertanggungjawab kerana tidak berdaftar dengan pihak Kerajaan negara tersebut bagi memastikan keberadaan mereka di Malaysia mematuhi undang-undang negara ini.

Berdasarkan rekod Jabatan Pendaftaran Negara (JPN) dari tahun 2015 hingga 15 Oktober 2020, seramai 694 pemohon dari kalangan individu Bukan Warganegara yang permohonannya diterima di negeri Sarawak telah dianugerahkan kewarganegaraan Malaysia di bawah pelbagai Perkara Perlembagaan Persekutuan.



**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : DR. LEE BOON CHYE [ GOPENG ]**

**TARIKH : 12 NOVEMBER 2020 (KHAMIS)**

**SOALAN**

**DR. LEE BOON CHYE [ GOPENG ]** minta **MENTERI KESIHATAN** menyatakan bilangan kompaun yang dikeluarkan untuk kesalahan merokok di premis makanan untuk tahun 2019 dan 2020.

**JAWAPAN**

**Tuan Yang di-Pertua,**

1. Penguatkuasaan larangan merokok di premis makanan telah dilaksanakan oleh Kementerian Kesihatan Malaysia (KKM) sebagaimana pewartaan di bawah Peraturan 11(1)(d) Peraturan-Peraturan Kawalan Hasil Tembakau (PPKHT) 2004 pindaan 2018. Pewartaan ini adalah selaras dengan komitmen Malaysia di bawah Artikel 8, *WHO Framework Convention on Tobacco Control (WHO FCTC)* bertujuan melindungi orang awam daripada bahaya asap rokok dan produk berkaitan tembakau yang lain.

2. **Pada 1 Januari 2019 sehingga 31 Disember 2019, pihak KKM telah mengambil keputusan untuk melaksanakan Penguatkuasaan Pendidikan dengan hanya mengeluarkan notis amaran dan TIADA sebarang kompaun dikeluarkan.** Dalam tempoh tersebut (1 Januari 2019 hingga 31 Disember 2019) sebanyak 161,163 premis makanan telah diperiksa dan 33,216 notis amaran telah dikeluarkan melibatkan kesalahan berikut :

- i. 4,499 kesalahan di bawah Peraturan 11(1)(d) iaitu kesalahan individu merokok di tempat larangan merokok; dan
- ii. 28,717 kesalahan di bawah Peraturan 12(1) (a) iaitu tiada tanda larangan merokok dipamerkan oleh Tuan Punya Premis.

3. Manakala, bagi tempoh 1 Januari 2020 sehingga 31 Oktober 2020, penguatkuasaan penuh telah dijalankan di mana sebanyak 155,618 premis makanan telah diperiksa dengan sejumlah 12,247 **kompaun** dikeluarkan bernilai **RM2.90 juta**. Kompaun yang telah dikeluarkan melibatkan pecahan kesalahan seperti berikut:

- i. 10,039 kesalahan di bawah Peraturan 11(1)(d) iaitu individu merokok di tempat larangan merokok;

## SOALAN NO : 44

- ii. 1,059 kesalahan di bawah 12(1) (a) iaitu tiada tanda larangan merokok dipamerkan oleh Tuan Punya Premis;
- iii. 364 kesalahan di bawah 12(1) (b) Tuan Punya Premis gagal memastikan tiada orang merokok di premis berkaitan; dan
- iv. 785 kesalahan di bawah 13(1) orang belum dewasa (di bawah umur 18 tahun) merokok.

4. Untuk makluman, aktiviti penguatkuasaan juga telah dihentikan buat sementara waktu semasa Perintah Kawalan Pergerakan yang bermula daripada 18 Mac 2020 bagi menumpukan usaha kepada pematuhan SOP COVID-19. **Namun begitu, bermula 1 Jun 2020 sehingga 31 Oktober 2020, KKM telah menguatkuasakan semula larangan merokok di premis makanan di mana sepanjang tempoh ini 1 Jun 2020 sehingga 31 Oktober 2020) sebanyak 41,563 premis dilawati dengan 5,269 jumlah kompaun dikeluarkan bernilai RM 1.26 juta.** Kompaun yang dikeluarkan melibatkan pecahan kesalahan seperti berikut:

- i. 4,748 kesalahan di bawah Peraturan 11(1)(d) iaitu individu merokok di tempat larangan merokok;
- ii. 130 kesalahan di bawah 12(1) (a) iaitu tiada tanda larangan merokok dipamerkan oleh Tuan Punya Premis;
- iii. 130 kesalahan di bawah 12(1) (b) Tuan Punya Premis gagal memastikan tiada orang merokok di premis berkaitan; dan
- iv. 263 di bawah 13(1) orang belum dewasa (di bawah umur 18 tahun) yang merokok.

5. Pihak KKM akan terus komited untuk melaksanakan penguatkuasaan larangan merokok di premis makanan walaupun di dalam situasi pandemik COVID 19 yang sedang melanda.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' SERI HAJI ABDUL HADI BIN AWANG  
[MARANG]**

**TARIKH : 12 NOVEMBER 2020 (KHAMIS)**

**SOALAN**

**DATO' SERI HAJI ABDUL HADI BIN AWANG [MARANG]** minta **MENTERI KANAN PERDAGANGAN ANTARABANGSA DAN INDUSTRI** menyatakan sejauh mana pelaksanaan Dasar Negara Mengenai Industri 4.0 mampu untuk mendepani cabaran dan bersedia dalam berhadapan era ekonomi digital.

**JAWAPAN**

**Yang di-Pertua,**

1. Kemunculan teknologi baru (emerging technology) telah mengubah landskap sektor pembuatan ke satu dimensi baharu dengan peningkatan dramatik dalam produktiviti dan kecekapan. Sektor pembuatan di Malaysia juga mula beralih daripada kebergantungan kepada tenaga kerja kurang mahir asing ke tenaga kerja berkemahiran tinggi dan penggunaan berasaskan teknologi. Transformasi teknologi industri 4.0 serta persaingan sengit negara-negara baru muncul (*new emerging countries*) turut mengubah model perniagaan syarikat.
2. Berikutan penularan COVID-19 dan impak kepada sektor ekonomi, penggunaan dan adaptasi teknologi Industri 4.0 dapat memastikan kesinambungan dan penambahbaikan perniagaan terutama dalam pemulihan perniagaan, penstrukturan semula rantai bekalan serta membolehkan Perusahaan Kecil & Sederhana (PKS) kembali berdaya saing. Adaptasi teknologi Industri 4.0 membolehkan PKS mengurangkan kos operasi dalam jangka masa panjang, mengurangkan kebergantungan kepada tenaga buruh serta meningkatkan produktiviti. Peralihan ini adalah penting bagi memastikan industri tempatan akan terus kekal berdaya saing dengan sokongan tenaga kerja berkemahiran tinggi dan inovatif.
3. Dasar Negara mengenai Industri 4.0 atau *Industry4WRD* dan Pelan Hala Tuju Strategik e-Dagang 2016-2020 merupakan dasar untuk mempertingkatkan transformasi digital di dalam sektor pembuatan dan aktiviti e-dagang agar terus meningkatkan sumbangan terhadap ekonomi, memperkukuh produktiviti, menggalakkan daya inovasi dan menambah bilangan tenaga kerja mahir. Dasar *Industry4WRD* ini adalah bertujuan untuk menggalak transformasi industri pembuatan dan perkhidmatan berkaitan untuk menjadi lebih pintar, sistematik dan berdaya saing melalui adaptasi teknologi Industri 4.0. Menerusi Dasar ini, beberapa pelan tindakan sedang dilaksanakan bagi membantu peralihan sektor pembuatan dan perkhidmatan yang berkaitan kepada Industri 4.0 berdasarkan lima (5) strategi pemboleh, iaitu Pembiayaan, Infrastruktur,

Rangka Kerja, Kemahiran & Bakat, dan Teknologi. Antara program utama di bawah dasar ini ialah:

- a. Program Penilaian Kesiediaan (*Readiness Assessment* – RA); dan
- b. Program Intervensi untuk membantu PKS mengaplikasikan teknologi Industri 4.0.

4. Program RA bertujuan untuk mengenal pasti tahap kesiediaan sesebuah syarikat pembuatan dan perkhidmatan berkaitan seterusnya menyediakan cadangan langkah-langkah penambahbaikan untuk beralih kepada Industri 4.0. Sehingga Oktober 2020, sebanyak 1,205 permohonan telah diterima dan 711 permohonan telah diluluskan. Seterusnya, syarikat-syarikat yang telah melalui program RA akan berpeluang untuk mengikuti Program Intervensi melalui kemudahan sokongan kewangan kepada PKS untuk mengaplikasikan teknologi Industri 4.0. Program Intervensi ini menawarkan Dana Intervensi *Industry4WRD (Intervention Fund)* dengan nisbah 70 peratus ditanggung oleh Kerajaan, tertakluk kepada had maksimum RM500,000 dan 30 peratus lagi ditanggung oleh pihak syarikat. Setakat Oktober 2020, sebanyak 41 buah syarikat telah diluluskan geran tersebut.

5. Peralihan kepada Industri 4.0 akan meningkatkan permintaan terhadap kumpulan sumber tenaga berkemahiran tinggi yang berteraskan teknologi Industri 4.0. Ini akan mengurangkan kebergantungan kepada bidang pekerjaan berkemahiran rendah yang bersumberkan tenaga buruh asing. Antara inisiatif yang sedang dilaksanakan termasuklah penyediaan program-program yang direka khusus dengan penekanan kemahiran teknologi 4.0 yang diperlukan oleh pihak industri bagi tujuan meningkatkan kemahiran (*upskilling*) dan melatih semula (*reskilling*) tenaga kerja sedia ada. Inisiatif ini juga akan memastikan ketersediaan bakat masa hadapan melalui pengukuhan pelajaran terhadap kemahiran terkini Industri 4.0 melalui penambahbaikan Pusat Kecemerlangan bagi latihan dan pembelajaran teknologi 4.0. Transformasi Industri 4.0. ini bukan sahaja akan mewujudkan peluang pekerjaan yang baharu serta mengurangkan kebergantungan kepada sumber tenaga asing tetapi juga

menyediakan persekitaran pekerjaan yang selamat melalui penggunaan teknologi Industri 4.0.

6. Bagi aspek inisiatif pendigitalan, Pelan Halatuju Strategik e-Dagang Kebangsaan, 2016 – 2020 telah dirangka untuk membangunkan ekosistem e-dagang negara, menjana potensi industri e-dagang tempatan ke arah menyumbang kepada pertumbuhan ekonomi negara. Antara pencapaian utama Pelan tersebut adalah termasuk:

- i. Sejumlah 335,834 Perusahaan Kecil dan Sederhana (PKS) telah dilatih untuk menggunakan platform e-dagang. Dalam tempoh lapan (8) bulan pertama tahun ini sahaja, sebanyak 92,274 PKS telah dilatih, melebihi sasaran tahunan seramai 50,000 PKS;
- ii. 20,970 PKS telah memanfaatkan platform e-dagang untuk jualan atas talian ke pasaran eksport. Melalui program eTRADE yang dilaksanakan oleh Perbadanan Pembangunan Perbadanan Luar Malaysia (MATRADE), PKS tersebut telah berjaya menembusi pasaran antarabangsa seperti Amerika Syarikat, China, Jepun, Arab Saudi, India, Mauritius dan Panama; dan
- iii. Dalam mewujudkan sistem logistik bersepadu, Lembaga Pembangunan Pelaburan Malaysia (MIDA) telah menarik dan meluluskan pelaburan bernilai RM1.5 bilion. Pada tahun ini sahaja, pelaburan berjumlah RM863 juta dalam hab e-fulfillment serantau telah diluluskan. Jumlah tersebut merupakan peningkatan sebanyak 17 kali ganda, berbanding sasaran asal iaitu RM50 juta yang ditetapkan di bawah Pelan Halatuju Strategik e-Dagang Kebangsaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : YB DATUK SERI PANGLIMA MADIUS  
TANGAU [TUARAN]**

**TARIKH : 12 NOVEMBER 2020 (KHAMIS)**

**SOALAN**

**DATUK SERI PANGLIMA MADIUS TANGAU [TUARAN]** minta **MENTERI SUMBER MANUSIA** menyatakan apakah langkah-langkah yang telah dan akan diambil untuk mewujudkan peluang-peluang pekerjaan di Sabah.

**JAWAPAN**

**Tuan Yang Di-pertua,**

1. Untuk makluman Ahli-Ahli Dewan yang mulia ini, langkah-langkah terbaru yang telah dan akan diambil oleh Kementerian Sumber Manusia (KSM) melalui Jabatan Tenaga Kerja Sabah (JTK Sabah) untuk mewujudkan peluang-peluang pekerjaan adalah seperti berikut:-

- i) JTK Sabah telah memberi penekanan kepada sektor minyak dan gas (*oil & gas*) memandangkan sektor ini telah mendapat penawaran yang tinggi daripada syarikat industri minyak dan gas. JTK Sabah telah membantu mewujudkan usahasama antara syarikat dan pihak penyedia latihan yang melibatkan latihan-latihan berkaitan kemahiran di *offshore*. Antara syarikat yang telah menandatangani perjanjian persefahaman (MOU) adalah *ECTC Academy* dengan Shahpadu Energy Services pada 22 Julai 2020 lalu yang melibatkan persetujuan pengambilan semua pelatih daripada institut latihan kemahiran tersebut untuk penempatan di syarikat Shahpadu Energy Services. Pada majlis pelancaran yang pertama,



## SOALAN NO: 46

seramai 20 orang pelatih telah berjaya ditempatkan melalui usahasama ini;

- ii) Dalam sektor peruncitan, JTK Sabah telah mengadakan kerjasama dengan *Sabah Skills & Technology Centre* (SSTC) dan Lestari Consultancy Professional Sdn. Bhd. dalam menyediakan sebanyak 300 peluang pekerjaan di sektor peruncitan. Sebanyak 25 program temuduga telah diadakan di 16 Pejabat Tenaga Kerja Sabah bagi memastikan peluang pekerjaan ini sampai kepada golongan pencari kerja.

Program berkonsepkan '*Train and Place*' ini merupakan satu program yang berkesan dalam usaha memastikan pencari kerja diberi peluang sepenuhnya termasuk pencari kerja yang tidak mempunyai pengalaman.

Program ini telah dijalankan pada bulan Julai dan Ogos 2020. Manakala untuk bulan September, program ini tertumpu kepada program Karnival Kerjaya di lima (5) daerah iaitu Kinabatangan, Libaran, Kota Kinabalu, Keningau dan Ranau;  
**dan**

- iii) Sukacita dimaklumkan bahawa melalui *Sabah Labour Ordinance* (SLO), mana-mana majikan yang berhasrat untuk memberhentikan pekerja, wajib melaporkan kepada JTK Sabah 30 hari sebelum pemberhentian pekerja dilaksanakan. Melalui tindakan ini, semua pekerja yang diberhentikan juga telah disalurkan kepada Pertubuhan Keselamatan Sosial (PERKESO) untuk mendapatkan faedah-faedah di bawah Sistem Insurans Pekerja (SIP) di samping penawaran kerja melalui portal *MYFutureJobs*.

**Tuan Yang Di-pertua,**

2. Selain daripada program tersebut, KSM juga telah mengadakan program-program lain di bawah agensi Pembangunan Sumber Manusia Berhad (PSMB) dan PERKESO.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE TIGA, PENGGAL KE TIGA,  
PARLIMEN KEEMPATBELAS**

---

**PERTANYAAN : JAWAB LISAN**

**DARIPADA : YB TUAN LIM LIP ENG (KEPONG)**

**TARIKH : 12 NOVEMBER 2020 (KHAMIS)**

**SOALAN**

**TUAN LIM LIP ENG [ KEPONG ]** minta **MENTERI DALAM NEGERI** menyatakan jumlah warga asing yang dibenarkan masuk ke Malaysia mengikut bulan sejak bermulanya penularan wabak COVID-19 pada bulan Mac dan sebab-sebab mereka dibenarkan masuk ke Malaysia.

**JAWAPAN**

**Tuan Yang Di Pertua,**

Seperti mana Ahli Yang Berhormat sedia maklum, Perintah Kawalan Pergerakan (PKP) dikuat kuasa oleh Kerajaan bermula 18 Mac 2020 sehingga kini bagi membendung penularan pandemik COVID-19, dan ianya termasuklah pengukuhan kawalan pintu masuk dan sempadan negara. Bagi tujuan ini, Kerajaan memperkenalkan kawalan kemasukan warganegara asing ke Malaysia melalui penetapan syarat-syarat permohonan yang ketat bagi kategori warganegara asing yang dibenarkan.

Jabatan Imigresen Malaysia (JIM) menetapkan tiga (3) saluran permohonan untuk masuk ke Persekutuan kepada warga asing iaitu permohonan secara manual kepada Ketua Pengarah JIM, permohonan secara atas talian menerusi MyEntry dan MyTravelPass. Pertimbangan bagi kelulusan permohonan tersebut dilaksanakan secara satu kes-ke-satu kes (*case-by-case*) bagi kategori warganegara asing seperti berikut:

- (i) ekspatriat;
- (ii) diplomat asing dan tanggungannya;
- (iii) pembantu rumah asing;
- (iv) pemegang Pas Lawatan Kerja Sementara (PLKS);
- (v) pasangan kepada warganegara Malaysia / pasangan kepada penduduk tetap / pasangan kepada Pas Residen / anak kepada warganegara Malaysia / anak kepada penduduk tetap;
- (vi) penduduk tetap; dan
- (vii) pemegang pas di bawah program *Malaysia My Second Home* (MM2H).

Antara lain, sesuatu permohonan kemasukan ke dalam negara boleh dipertimbangkan atas faktor kepentingan seperti bagi menjana semula ekonomi negara. Sejak Perintah Kawalan Pergerakan Bersyarat, semua sektor ekonomi dibuka dan tidak terhad kepada 'essential services' dan industri petroleum sahaja. Selain itu, JIM juga mempertimbangkan kebenaran masuk bagi kes-kes kecemasan seperti kematian keluarga terdekat.

Bermula 18 Mac 2020 sehingga 5 November 2020, JIM menerima 47,043 permohonan untuk masuk ke Malaysia dan daripada jumlah keseluruhan tersebut, sebanyak 30,046 atau 63.9% permohonan telah diluluskan manakala 16,997 atau 36.1% permohonan ditolak.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : YB TUAN M. KULASEGARAN [ IPOH BARAT ]**

**TARIKH : 12 NOVEMBER 2020 (KHAMIS)**

**SOALAN**

**YB TUAN M. KULASEGARAN** minta **MENTERI SUMBER MANUSIA** menyatakan :

- (a) jumlah kes Akta Perhubungan Perusahaan 1967 yang dirujuk oleh Menteri setakat ini; dan
- (b) bilakah pindaan Akta Perhubungan Perusahaan 1967 akan diwartakan.

**JAWAPAN**

**Tuan Yang di-Pertua,**

1. Untuk makluman Ahli-Ahli Dewan Yang Mulia ini, terdapat beberapa Seksyen di dalam Akta Perhubungan Perusahaan 1967 (Akta 177) yang melibatkan kuasa YB Menteri Sumber Manusia dalam membuat keputusan sama ada kes dirujuk atau tidak dirujuk kepada Mahkamah Perusahaan.
2. Antaranya adalah kes aduan di bawah Seksyen 8, kes melibatkan Perjanjian kolektif di bawah Seksyen 13, kes pertikaian perusahaan di bawah Seksyen 18 dan kes representasi pemulihan kerja di bawah Seksyen 20, Akta Perhubungan Perusahaan 1967 (Akta 177).
3. Bilangan kes yang telah dirujuk kepada Mahkamah Perusahaan pada tahun ini sehingga 15 Oktober 2020 adalah sebanyak tiga (3) kes di bawah Seksyen 8, dua puluh (20) kes di bawah Seksyen 13, dua belas (12) kes di bawah Seksyen 18 dan 1,723 kes di bawah Seksyen 20.
4. Kementerian Sumber Manusia bercadang untuk menetapkan tarikh kuatkuasa pindaan Akta ini mulai 1 Januari 2021. Kementerian pada masa ini sedang dalam proses untukewartakan tarikh kuatkuasa akta tersebut.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN NGA KOR MING [TELUK INTAN]**

**TARIKH : 12 NOVEMBER 2020 (KHAMIS)**

**SOALAN**

**TUAN NGA KOR MING [ TELUK INTAN ]** minta **MENTERI ALAM SEKITAR DAN AIR** menyatakan perkembangan terkini tentang Rancangan Tebatan Banjir Teluk Intan Zona A Fasa 2, Perak yang telah diluluskan sejak tahun 2019.

**JAWAPAN**

**Tuan Yang Di-Pertua,**

1. Projek Rancangan Tebatan Banjir (RTB) Teluk Intan Zona A Fasa 2, Perak ini dilaksanakan untuk meningkatkan tahap perlindungan banjir di bandar Teluk Intan. Ini adalah kerana bandar tersebut kerap mengalami banjir apabila berlaku pertembungan limpahan air sungai dari hulu Sungai Perak dengan air pasang surut semasa hujan lebat.
2. Untuk makluman Ahli Yang Berhormat Teluk Intan, projek RTB ini menggunakan kaedah konvensional di mana plan rekabentuk terperinci projek perlu disiapkan terlebih dahulu sebelum kerja pembinaan boleh dilaksanakan di tapak.
3. Lantikan perunding bagi kerja-kerja rekabentuk terperinci bagi Projek RTB Teluk Intan Zona A Fasa 2, Perak telah dibuat pada Mac 2020 yang lalu. Kerja rekabentuk terperinci projek dijangka siap pada penghujung tahun 2021 dan kerja fizikal di tapak dijangka mula pada pertengahan tahun 2022.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE TIGA, PENGGAL KE TIGA,  
PARLIMEN EMPATBELAS**

---

**PERTANYAAN : JAWAB LISAN**

**DARIPADA : YB TUAN NIK MOHAMAD ABDUH B. NIK ABDUL  
AZIZ (BACHOK)**

**TARIKH : 12 NOVEMBER 2020 (KHAMIS)**

**SOALAN**

**TUAN NIK MOHAMAD ABDUH BIN NIK ABDUL AZIZ [ BACHOK ]** minta **MENTERI DALAM NEGERI** menyatakan perkembangan siasatan terhadap insiden kemasukan bot Pendatang Asing Tanpa Izin (PATI) yang memasuki perairan negara pada Jun yang lalu.

**JAWAPAN**

**Tuan Yang Di Pertua,**

Untuk makluman Ahli Yang Berhormat, pada 8 Jun 2020, Agensi Penguatkuasaan Maritim Malaysia (APMM) melalui Pejabat Maritim Negeri Kedah dan Perlis telah menerima maklumat daripada orang awam berkenaan penemuan sebuah bot kayu disyaki digunakan untuk membawa masuk PATI Etnik Rohingya di perairan Pulau Langkawi. Sehubungan dengan itu, APMM telah menggerakkan aset untuk mengesan dan menahan bot tersebut.

Hasil daripada pemeriksaan didapati seramai 269 orang PATI Etnik Rohingya berada di dalam bot tersebut dan kesemua PATI tersebut telah ditahan dan diserahkan kepada Jabatan Imigresen Malaysia (JIM) Negeri Kedah untuk tindakan siasatan lanjut. Kesemua PATI Etnik Rohingya telah ditempatkan di Kem Wawasan Negara, Pulau Langkawi.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN LIM KIT SIANG ISMAIL  
[ ISKANDAR PUTERI ]**

**TARIKH : 12 NOVEMBER 2020 (KHAMIS)**

**SOALAN**

**TUAN LIM KIT SIANG [ ISKANDAR PUTERI ]** minta **MENTERI KESIHATAN** menyatakan jumlah hasil yang telah diraih oleh Kerajaan melalui pengeluaran kompaun dan denda yang dikenakan kepada mereka yang mengingkari SOP COVID-19.

**JAWAPAN**

**Tuan Yang di-Pertua,**

- 1. Sehingga 7 November 2020, jumlah tawaran kompaun yang telah dikeluarkan oleh pihak Kementerian Kesihatan Malaysia (KKM) adalah sebanyak 1,901. Manakala, jumlah keseluruhan tawaran kompaun yang telah dikeluarkan oleh pihak Kerajaan melalui agensi penguatkuasaan yang lain adalah sebanyak 44,958.**
- 2. Daripada jumlah keseluruhan tawaran kompaun yang telah dikeluarkan oleh pihak Kerajaan termasuk KKM, sebanyak 23,493 tawaran kompaun telah dibayar oleh pihak Orang Kena Kompaun (OKK) dengan nilai keseluruhan berjumlah RM20.74juta.**

Sekian, terima kasih.



**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

**PERTANYAAN : LISAN**

**DARIPADA : DR. ONG KIAN MING [ BANGI ]**

**TARIKH : 12 NOVEMBER 2020 (KHAMIS)**

**SOALAN**

**DR. ONG KIAN MING [ BANGI ]** minta **MENTERI KESIHATAN** menyatakan jumlah pesakit COVID-19 yang berjaya dikesan melalui aplikasi MySejahtera dan apakah sistem amaran yang digunakan untuk memberitahu pengguna MySejahtera bahawa tempat yang dilawati adalah satu tempat yang telah dikunjungi oleh pesakit COVID-19.

**JAWAPAN**

**Tuan Yang di-Pertua,**

1. **Aplikasi MySejahtera telah dilancarkan pada 20 April 2020** yang bertujuan untuk membantu pengurusan wabak COVID-19 di Malaysia termasuk pengesanan kes COVID-19 melalui penilaian kesihatan sendiri, pengesanan kontak kepada kes positif COVID-19 dan pemberian maklumat terkini dan sahih berkaitan COVID-19 serta maklumat kesihatan umum kepada masyarakat.
2. Pada permulaannya, MySejahtera hanya mempunyai satu (1) modul. **Walau bagaimanapun, sebanyak lapan (8) modul lagi ditambah bagi memenuhi keperluan Kementerian Kesihatan Malaysia (KKM) untuk mendapatkan maklumat tambahan kontak, lokasi kes dan kontak, pengendalian kuarantin dan stesen kuarantin serta lain-lain.**

3. Sehingga kini, seramai 23 juta pengguna telah mendapat manfaat daripada aplikasi ini. Ianya juga menambah nilai kepada pengendalian pengesanan kontak kepada kes-kes positif COVID-19.

4. **Setakat ini, kira-kira 4% dari keseluruhan kes telah berjaya dikesan secara langsung melalui penilaian kesihatan sendiri dalam aplikasi MySejahtera.** Walau bagaimanapun, kes-kes yang selebihnya dikesan secara tidak langsung melalui aplikasi tersebut, di mana senarai kes-kes rentan (*vulnerable*) terutamanya dapat diberi secara cepat dan tepat melalui aplikasi ini kepada pegawai diberikuasa.

5. **Modul pengesan hotspot** dalam MySejahtera pula merupakan satu fungsi yang menunjukkan **lokasi punca dan potensi kebolehjangkitan** kes COVID-19. **Fungsi ini adalah “on demand” yang memerlukan pengguna untuk menyemak status dari masa ke semasa.** Modul ini memberi panduan kepada pengguna untuk mengetahui status sesuatu lokasi yang dicari.

6. Setakat ini aplikasi MySejahtera tidak menggunakan GPS secara berterusan. **Justeru, aplikasi ini tidak dapat memberi notifikasi secara automatik atau tidak cuba menjejaki seseorang individu kerana ia adalah bertentangan dengan hak peribadi pengguna serta bercanggah dengan polisi KKM.**

Sekian, terima kasih.